

支那  
撰述

起信論疏筆削記

卷十六之一  
二十終

印




C40  
4514  
232



80 1 2 3 4 5 6 7 8 9 100 1 2 3 4 5 6 7 8 9

C40-4514

了翁上座請大藏及有  
家書置武州紫雲山  
我微笑塔院住持中永  
為學者不敢許出院內  
當山二世鐵牛機譚錄



B E4853

起信論疏筆削記卷第十六

長水沙門子璿錄

△對治邪執者垂真曰邪取著名執相形曰對攻擊  
名治則前正義是能治今邪執是所治正義既顯邪  
執自今則叙釋其相也論一切下正標若離下反  
顯我是根本起復由之故云依我而有離我而無△  
二徵列疏總相等者不能分別五蘊差別但總相執  
取爲主宰也然其我相有於四種一衆生相是過去  
衆緣和合之所生故二壽者相是現枉一期住壽不  
斷緣故三人相是未來數於餘趣而受生故四我相

是三世之總主故故今云我爲總相主宰也此是下  
揀濫此約學大乘初心凡夫聞大乘教不解佛旨隨  
自妄心曲裁聖典習以性成故作此見非是外道者  
彼有三宗所計不同如前已說今非此類計一切等  
者計色等法各自有實體性故攝論云若執法體是  
有名法我執等以二乘人依二麤事識修行但了法  
中無我不知法體全空如前云見從外來取色分齊  
等於染淨境執有自性故名法執其猶翳目旣存空  
華豈滅△論云何下疏二初約義通辨此五何別者  
牒外所問約果者於如來法身之上起於執故通因

果者皆依如來藏之所執故如來藏性通於因果又  
於五中初二多是習頓教空教及南宗禪學失意者  
所執次二多是習大乘法相及北宗禪學失意者所  
執後一唯是外道邪見所執如科文者如下可見○  
問此下二問答釋名問意云真如是法於此生執合  
是法執云何反名人我執耶此一向約所執以成難  
一云下約能執者以通此則約有人我者作此執故  
非約所執得名二云下約所執法以通本覺是人者  
以所執法中有一分覺照義屬智故名爲人執此爲  
我故名人我也理實者約寂體說卽當所觀屬於法

也執事空爲法體者此卽世間頑虛之空是識所變由色所顯非是三乘所證理法故云事空執此事空爲真法體故△一執緣論法身如空者金鼓經云佛真法身猶若虛空華嚴云普賢身相如虛空淨名云不著世間如蓮華常善入於空寂行達諸法相無罣礙稽首如空無所依又經云虛空無中邊諸佛身亦然不生不滅故敬禮無所觀此文至多不能具引△二執相疏礙相等者謂眾生定執佛有三十二相等色見有去來取色分齊質礙等相迷意等者佛意以空有無相無礙之義喻同法身體不言虛空便是法

身斯迷喻爲法也法喻不分最爲淺近△一立論空

相者以虛豁無礙爲相也是妄法者妄識所變故是色所對故生大覺中如一漚故一人發真歸元十方虛空悉皆消殞誠爲妄法疏情有者妄情見有理合是妄論體無不實者有二意一明真體之中無此不實之妄空故二明空體自無本不實故疏云理無正當初義兼於後義△二釋論對色故有者與色法相對待故離色所顯故名爲空若無色顯空不得有可見相者以是空一顯色故有色處則見無空無色處則見有空有時無時亦爾令心生滅者有時則見有

80

90

100

110

9

心生見無心滅無時則見無心生見有心滅既能引  
 心生滅豈若法身若是法身不合令心生滅疏相待  
 者釋前對色故有也妄念緣者釋前是可見相非法  
 身者法身異此無有無處無有無時亦無一相可得  
 尚不可以智知豈容妄念所緣今既妄念所及故非  
 法身論若無色下正顯體無也以能顯之色尚不可  
 得所顯之空理應是虛楞嚴亦云空性無形因色顯  
 發又云色相旣無誰明空質疏文可知△三結疏結  
 情有者亦是釋無色之所以卽前依轉相有現相義  
 然此且是正釋論一切境界者卽色空俱攝也疏結

理無者亦是轉釋或名反釋卽前心無起故境界隨  
 滅乃至得涅槃等是知虛空但是真性之中一分妄  
 相故楞嚴云空生大覺中如海一漚發辯法同喻等  
 者卽因便取喻非論正意若據論意但約爲遡情執  
 之有故以爲喻非謂表於真如體徧故前云寂寘如  
 空次云廣大性智非如虛空等有智請詳△二真非  
 妄疏豈同等者有兩義一究竟不究竟故二覺知不  
 覺知故圓覺疏云方之海印越彼太虛華嚴云解  
 如來身非如虛空無量功德妙法所圓滿故問上云  
 正義爲能治邪執爲所治前旣已顯正義此文只應

但明邪執何故復有能治之文豈不重耶答前文正義雖是能治以未能約執對顯今此文中逐段別舉執相將前正義別別對破斯則由此邪執顯得前義正真亦由前義明得此執僞妄故須別舉治文也只如此段對治之文卽當前云一切諸法唯依妄念而有差別又云非有相非無相又云依此法身說名本覺又智淨相法出離鏡又以法身爲智身等竝是此能治之文也△一執緣論涅槃空者圓覺云生死涅槃猶如昨夢真如空者楞嚴云言妄顯諸真妄真同二妄又云無爲無起滅不實如空華等疏大品等者

具云時五百天子默然憶念云何說涅槃等亦如夢耶善現知諸天子作如是念而告之言若當有法過涅槃者我亦說爲如幻如夢何以故從本已來本自空故△二執相疏不知等者本爲破於有取之心故說爲空空者意明離名離相之義不無圓成實體具性功德不了佛意謂同徧計之法舉體全空斯則傷之太甚△三治論自體不空者卽前如實不空以有自體義及前體大不增減等具功德者卽前所示相大大智慧光明義等是此對治文也△一執緣論體備等者圓覺云無上法王有大阨羅尼門名爲圓覺

流出一切清淨真如菩提涅槃及波羅蜜等圓覺卽  
如來藏之異名也更有諸經不能具引△二執相論  
不解者此是表詮令生信解不同前二遮詮遣執故  
言不解不言爲破著也下皆如此△三治論依真如  
義說者此約真性顯功德也真體本一義說有差既  
於一體之上說功德義卽差別而無差別也疏二之  
不二者上論云雖實有此諸功德義而無差別之相  
等同一味唯一真如以無分別離分別相等論因生  
滅等者此對妄法顯功德也旣對妄顯此亦差卽無  
差也疏不二之二者如前文云若心起見則有不見

之相心性離見卽是徧照法界義等如上等者卽能  
治之文△一執緣論諸法不離真如者圓覺云一切  
衆生種種幻化皆生如來圓覺妙心華嚴云三界所  
有唯是一心又云未曾有一法得離於法性△二執  
相疏隨緣等者此明真如隨無明緣成世間法以不  
敏故謂真體中本有此染△一奪疏淨德妙有者卽  
不空如來藏也大抵同前第二中能治之文廣如相  
大中辨妄染理無者有二意一真理中無此妄染卽  
空如來藏也二據妄自性道理亦無上文云以一切  
法皆從心起妄念而生又云一切法如鏡中像無體

可得等妄不入真者卽不相應也上文云從本已來一切染法不相應故以妄體本空將何入真與真相應△二縱破論無有是處者妄若實有證時不合除滅證者旣能除滅當知妄本不有以真體證時畢竟不無故近有人聞性具義不能深究理趣便謂本性具有十界色心漏無漏法起用之時各於本法自體上起名全體之用宛如第八識中含種無異此同前段執性

德同色心又說真性除無明有差別義即同此段執法性本有杂執往往形於簡牘疑誤後生反謗圓文却謂方便菩薩懸知今日垂此對治善哉大士悲救何甚儻無悛意確乎

迷情豈唯邪見之門不扃抑亦阿鼻之路尤近也悲夫廣有破斥已見別章△一執緣疏各二法者謂執緣執相對治之文皆雙顯生死涅槃二法在文可見論有生死涅槃者此是勝鬘經文已如前引又經云無始時來性爲諸法依止由此有諸趣及證涅槃果盡不達此理遂成始終之見下文具顯亦同圓覺剛藏三問中第三問也文云若諸衆生本來成佛後起無明一切如來何時復生一切煩惱亦如楞嚴第四

所明斯則生死涅槃悉有始終也疏外道等者謂數論師以彼依非想定發世俗通應於邪道知過去八萬劫事過此卽不知以生死智通知未來八萬劫死此生彼之事後亦不知也彼之所計冥性是常從生於世間諸法冥冥難知故云冥性云何而生謂從冥初生覺從覺生我心從我心生五唯量謂色聲香味觸從五唯量生五大謂地水火風空從五大生十一根謂五知根眼耳鼻舌身五作業根手腳口大小便根及心平等根爾時名生死成執一神我爲受用主我思勝境冥性變生爲我受用我受用故爲境

縛不得解脫我若不思冥性不變神我解脫名爲涅槃此有二十五諦冥性爲初能變起故△一生死無初論無明無始者卽前依如來藏有生滅心等又云無明皆是能治之文疏仁王等者彼經第一云善男子一切衆生煩惱不出三界諸佛應化法身亦不出三界三界無衆生佛何所化是故我言三界外別有一衆生界者是外道大有經中說非七佛之所說也大有經者彼勝論師說有六句一實二德三業四大有五同異六和合此六句中彼有大性能有一切法

離一切法別有體故△二中論涅槃無後際者卽前云所謂心性不生不滅又云非前際生非後際滅又云法身顯現起用無斷等皆是能治之文△一執緣論人無我者小乘藏中所說以根非利故但爲分別蘊中無人令證人空也△二執相論說不究竟者未說法空教名半字然有多義名不究竟一行但行自利未能利他二智但得生空智不得法空智三斷但斷煩惱不斷所知四證但證生空理不證法空理五得但得有餘無餘涅槃不得無住處涅槃見五陰者雖於蘊中不見人相而見蘊等是其實法旣執陰法

實有故見三界不安猶如火宅希求出離如救頭然望到寂滅安樂之處△三治論五陰自性不生等者卽前真如門云一切法從本已來離言說名字心緣等相畢竟平等又云一切法卽真實性等又同相文云一切衆生本來常住入於涅槃下文復云以信一切法從本已來自涅槃故會相入實文中皆是能治也△二究竟離者前且據其病狀隨病設藥故對空說有對有說空未能究竟今則具約真理一切皆遣言說道斷心行處滅平等一味方名究竟是則對治符於依言真如究竟符於離言真如也一總顯論深

淨無自相者所以得名染者以待淨立當知染相非自相也淨相亦爾餘本末有空生佛乃至世出世等倣此而知故淨名云若見垢實性卽無淨相順於滅相是爲入不二法門疏因待者若染法因待淨成卽淨法還爲染待如是展轉墮無窮過無因待等者若本無染爲因爲待則何有淨爲所成法相待無相待下或問曰此諸染淨應可在迷之時未得離於相待悟後方得相待卽無相待耶故此釋云法體本爾非謂由悟始得如是以染淨法本離言說分別畢竟平等何須待悟方始無耶如下自釋△二類求疏顯上

非心者此顯非智等一句上則總標非色非心今此非智等重示非心義也顯上非色者如前可見亦可此句重覆前非色等義謂非色心智識等卽以攝盡世出世間一切相待諸法皆無也今恐聞此無故便作無解墮於斷見今則覆疎有無俱絕也又是覆前對治離中能治所治空有之法俱不立也前則以藥治病此則藥病俱遣究竟離義於斯顯矣論畢竟不可說相者結也此有兩意一約時謂明色心等相非唯是時不可說盡於未來畢竟亦不可說二約法非謂法體不可作色心等相說餘一異凡聖因果生死

80 1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

涅槃一切相畢竟不可說故前真如門云一切法從本已來離言說相離名字相等今則相盡歸如合於本體入真如門也△一正會伏疑者和會佛意以釋疑難此疑不顯但有釋文伏而不現故云伏疑疏離性者本性無故本性既無何相之有如前所離之文故經云凡所有相皆是虛妄種種言說者卽前顯示正義之文也假言等者如假筏渡河意不在筏以此土衆生皆以聞思修入三摩地故須以音聲爲佛事也故經云此方真教體清淨枉音聞欲取三摩提實以聞中入又經云總持無文字佛以文字說△二釋

意論離念歸如等者意令離前邪執有無等念歸於真如故智論云念想觀已除言語法皆滅如是尊妙人則能見般若△三釋成論令心生滅者心通真妄但依主持業之異詳之實智卽本覺能入卽始覺十地已還不得入者蓋緣有念也故前文云一切衆生不名爲覺以從本已來念念生滅未曾離念故△分別發趣道相者前雖正義已顯邪執又亾直論見解苟無偏僻然於發心趣求修證階降殊未諳悉若止而不進則前解何爲有解無行如風中燈照物不了亦如有目無足豈到前所苟或進之則知復何往故

此分別令知知已令進則免其叨濫上流及自輕退屈爾自此已下則釋立義分中所立乘義也一標意釋名者文中但有標章釋名而無標意之語恐章字誤爲意字智者詳之疏覺道者卽所證菩提果也佛果圓通故名爲道論發心卽發三種心修行卽始從信位終至金剛已還所行二利諸波羅蜜一一皆能趣向上位故疏欲明等者通叙其意明卽分別也種類不同者釋相之一字卽發心與行各有不同故名相也如發心橫有真信成就發心等他發僞學他發心等也豎有淺信成就發故行則可知△一標論發心三

心溪

證發心解行發心通於漢淺

種者義有通別通則總名發趣故標云發心修行趣向義故別則前二是發起後一是開發又心爲所發人及菩提爲能發謂人能起發菩提能引發謂此人有內勲爲因緣善根爲增上緣菩提爲所緣境由此衆緣而發其心斯則以能望所名爲發心又隨位別有能所發趣之義至文當辨△二徵列疏十信等者斯則十信滿心人爲能發直等三心爲所發又十信滿心爲能趣十住位爲所趣二位出入心同時義如前說解法空者卽下云以知法性無慳貪乃至無無明等知卽解也順行十度者下說順性修行檀波羅

蜜乃至般若波羅蜜等能所發趣例上可知初地等者此以二地乃至佛果辨能所發趣等義前二下料揀優劣相似者以有分別心故名相似覺真實者以得無分別智故卽隨分覺通約證理故云真實然此三中初該信住次該行向後該地果此三種心從因至果一切行位靡不足矣△一問論依何等人者約何位人說發心義修何等行者由行何行而得發心據下答意卽依十信位人修信進念等十種善行十千劫滿至第十信滿心則能發也△疏前信等者卽明此答中前後兩科意也一能修人疏多門者謂小

乘及權實等異已見前文於此三中今取實教明三聚義如疏分別△二所修論信業果報者業通善惡果通樂苦果能酬因故名爲報此通而言也非約總別十善者卽不殺等十非謂十種信心若信等十下文方配疏謂有下聞熏通師教內熏兼體相善根者若準過去還因熏力所成今望現枉且名宿善就因所論故名爲根能信下卽止滅相義也答雖有善以創熏故善根微劣方成其種未能起信勤求諸行今以再習再熏及三事併力故能起也是則善根枉答爲所成枉今爲能起正同法華繫珠解珠之譬也福

德分分卽因義此十善行始成世間有漏福終成出世無漏福故亦卽福德中之一分也以福有無量故亦卽福德之分齊也顯非智慧故論獸生死等者信解漸增故能知三界不安猶如火宅所以獸之知菩提佛果是極清涼所以求之疏菩提分等亦如前說此二分并上福德分至果成就如次爲智斷恩之三德也行因者欣厭之事情動於中因此起行故名行因問修十善因已是其行云何目爲行因耶答望後出世之行故以世善爲因斯則世間有漏行與出世無漏行爲因也問獸生死求菩提豈非出世行耶答

雖有此心未有其事獸欲之言思之可見又此獸求但是事善未與理觀相應不名正行然據此文猶在信前未入十信且爲十信作方便也如世起獸求心欲行善者豈便是十信人耶故疏云上皆辯行因者是此義也次云修行信心方是正十信位論得值等者佛卽據位合是應身於中隨機現化不定一種謂作父母眷屬等已如前說今但言佛者據本而言也可親承者謂親得承受佛之教誨也旣爲現身必聞法要卽聞法生解修行信心疏行緣者卽用熏習中

差別緣也謂約等者以前云因緣具足乃得成辦故不可闕十信心者謂信進念定慧施戒護捨願也於此位中具起四種信心行五種妙行修習真如三昧漸入漸深以至成熟堪入初住爾△三行成論一萬劫者約根利鈍料揀有四句一利根不精進二利根精進此二劫數皆不可定三鈍根精進極遲一萬劫四鈍不精進此乃困而不學何足以議其劫數耶今此論中取第三者故云一萬劫故本業經云是信相菩薩十千劫行十戒法當出十信心入初住位又彼經云若一劫二劫三劫修十善法亦退亦出若值善友能信佛

法若一劫二劫方入住位疏行成者本疏云時滿行成時謂十千劫行謂十信心滿至出心也論諸佛菩薩者卽前所值佛菩薩等此中旣敎令發心猶在信位所值之佛或化或報也疏約勝緣者卽佛及菩薩衆生苦正法滅皆是勝緣佛菩薩等旣坐誨勗焉不發心我等每遇微智片福之人有所勸喻尚自發心況佛及菩薩親授敎誨耶或觀一切衆生與已無異但以迷眞執妄枉受輪迴是故起大悲心咸欲濟度自愧力小事與願違故且發心趣求佛果剋備神用方堪拯濟故十地經云見諸衆生孤獨無侶生哀愍

心此如有人見民疲極賦重役繁正令不行罔知所訴自惟無力如何治之因而進德修業求薦取仕務去民瘼令上下無怨以致治也或見佛法將滅衆生無依爲欲護持又寡道力故發心修行以希入證隨其力用方能振舉然夫言法者具教理行果今之滅者但於四中約教行滅理果不滅教滅者且佛坐教意在弘通若沈廢不行卽是滅義不必如始皇之煨燼師子之焚燒正如序中沈貝葉之義也行滅者無人修故智論云法滅者謂修行滅今所護持亦唯教行卽書寫讀誦隨分解說獎勸後學使燈燈相續

明明無盡是護教也若剋已修進勗勵有緣令佛種不斷是護行也若復細詳理果二法亦有滅義然與上教行相因而滅由無教故無行無行故無證無證故無果也此四雖皆名滅而滅義不同謂教行唯斷滅理法唯隱滅果約性相兼於二義故涅槃說有二種因緣令正法久住一者內有持戒比丘二者外有篤信檀越又說釋迦遺法最後滅時諸比丘等不是闕乏供養令佛法滅却因四事豐足憍恣心生天魔得便釋迦遺法從是永滅苟或發心趣求佛果豈唯持戒故其佛法無以見滅今論中言或者卽不定義

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

於前三中隨當一事卽能發心也勝緣下然此菩薩萬劫修行器用非淺因緣發趣豈唯此三故今略而舉之以二利行中緣有無量不可具載故云略也於中下配自他以由他所教出自已心二不同故亦同下配所發心直心者下云一者直心正念真如法故以蒙親教遂能發心正念真如離於沈掉一切邪曲名爲直也渙心者爲欲護法故須創意備修萬行具諸功德卽成此心餘同卽大悲心也如文可見△三結成疏不墮凡小等者故十地論說令護二行謂護煩惱行及二乘行若初心人聞責凡夫行却落二乘

行聞呵二乘行却入凡夫行不肯行於中道今得信心成就故不墮爾習種性者本業經中從因至果攝爲六種性謂十住習種性十行性種性十迴向道種性十地聖種性等覺性妙覺性今卽初也順內熏者反與真如體相順此揀地上無分別心之相應也以地上與理合故名爲相應今此地前但隨順故名爲相應以未得無分別心故定當得果者由住佛果之正因故謂此菩薩入正定聚與佛正因相應旣順其因決定得果故云入如來種中種卽因也△一內因論善根微少者根劣也以夙熏善種不能多故疏

惑重者貪瞋熾然不能制故論值佛者此通滅後見佛形像亦得供養故疏倒求者樂修五戒十善但希人天果報人天不離生死合是所厭而反求之故云倒也約果言因故論云種子與求者謂怖畏生死樂觀諦緣求二乘果雖出三界未能究竟不與三世諸佛同塗故云異也論進退等如下自辨然此段文從初至供養合俱是德薄以善根等是德本故餘皆行劣也許之△二外緣論或有供養至墮二乘地盡是辨求大乘者進退之相也疏時未滿者以約鈍根精進者說故以色見佛者既以色見聲求是人行邪道

不能見如來故前云不知轉識現故見從外來取色分齊或見如來塑畫形像等住相供僧者不能達三輪體空無住行施也隨劣教者此與前起二乘種子別前則因劣此則緣劣也學他迹者但隨彼而行自無決擇敷他外迹不自照心此則見他退而還退或心闌而自退此等者結揀以悲智是菩提心體故夫大乘行人最初發菩提心要先有智了真性本有無明本空求斷本空無明求證本有真性次須具悲盡於未來度衆生界然後以願要制不令贊捨無致疲勞此三具故方是真正大乘初行既不同彼故云非

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

也然此中發心之言且是信位初心始發求道之意  
 非同信滿發心入住則如今之行人始發大乘信心  
 之者此卽猶在信位之初也△二結成論惡緣者五  
 欲及二乘退失者失所發心不入信位退凡夫地此  
 以五欲爲惡緣故墮二乘地者此以二乘爲惡緣故  
 故經云百千萬人發菩提心若一若二至於佛果餘  
 皆墮二乘也又經云菩薩發大心魚子菴樹華三事  
 因時多得果甚少然此前後勝劣相望各有七事且  
 劣之七事者一位次劣十信二內熏劣無三善根劣無  
 微少四時限劣未經五外緣劣色相見佛六起行劣入天七  
 六起行勝直漢七究竟勝正定△一牒章論發何等  
 心者前之所說但是能發之因緣未知所發之心作  
 何行相故此徵也△二標徵疏向理等者真如妙理  
 體離無有一異凡聖潔淨等一切邊邪之相若欲造  
 詣必須正念正念卽正慧正慧卽是直心也斯則理  
 無別故向心必直故占察經說真如能成行人質直  
 心故如麁行性曲入筒則直三昧調心亦復如是此  
 中正念卽真如三昧也二行本者此直心通與二行

爲本也下之二心別爲行本所以此通與二行爲本者謂念真如具無漏功德一切衆生同有此性皆當作佛以知具德故能起自利行以知性同故能起利他行依本行所又以念真如非前際生非後際滅故能令二行究竟無有疲厭斷本行不應本又知此性離言說分別畢竟平等故能令二行離相成無漏因行相應本故此一心通爲二本也論樂集等者樂謂希欲專注決定之謂也由是知之不如好之好之者不如樂之者也疏備具萬德者六度萬行一切皆修所修之行一一翻對妄深以顯性上河沙功德如以智慧翻破無明顯成

性上大智慧光明義等是知修行蓋爲顯德故約所成以解修行據此則不唯深心亦得名廣大心以萬行齊修故廣也皆徹心源故淡也今論標之以豎故曰深心釋之以橫故云一切意以二文相顯也故今疏文亦兼二義若有深而不廣微理之行或復廣而不深多行世善皆非大乘之行今此兼明以成菩薩之大行矣自利行本者深心願樂故若不願樂安能行之是故爲本論欲拔等者欲謂希望與樂字義同可以互言疏廣拔物苦者廣大心也三界普度無怨親故令得苦提者第一心也廻出入天及二乘故若不爾者寧曰

大悲然拔物苦正是大悲令得菩提是大慈也以菩提是樂果慈能與樂故今論但舉大悲拔苦必有大慈與樂故疏兼而釋之也若無此心焉能度脫故云行本妙行下顯略攝廣文雖三種義包一切理事兼行自他俱利攝無不盡也以此下正配諸行三聚戒者直心卽攝律儀戒正念真如離諸過故淡心卽攝善法戒悲心卽攝衆生戒三德者直心成斷德卽法身淡心成智德卽般若悲心成恩德卽解脫三身卽如次配法報化是彼者卽指信成就發心之人迴自己心趣向三處故名迴向實際者真如卽是真實際

故菩提者以一切善行皆以大智爲其首故衆生可知據此則三中初一爲離相行後二是隨相行離相是總隨相是別說雖前後行卽同時以前一具後二故雖觀空而萬行迢然後二同前一故雖法有而一真寂爾苟或互闕卽二乘斷空凡夫有漏初後相濟方爲大乘中道妙行也由是諸行雖多此三攝盡更有三法三寶三菩提三涅槃等一切三法類此配之故淨名說此以爲淨土之行故經云直心是菩薩淨土菩薩成佛時不詣衆生來生其國淡心是菩薩淨土菩薩成佛時具足功德衆生來生其國四無量心

是菩薩淨土菩薩成佛時成就慈悲喜捨衆生來生其國等

### 起信論疏筆削記卷第十六

音切

殞

爲閔故

俊

且泉同

局

古焚

莫洛

烏囉詳進

塑

殞

切

俊

孝筒同

局

古焚

莫洛

烏囉詳進

塑

殞

切

俊

孝筒同

局

古焚

莫洛

烏囉詳進

塑

△起信論疏筆削記卷第十七

長水沙門子璿錄

△一問論上說下引前所說以爲義宗卽前云所言覺義者謂心體離念離念相者等虛空界無所不徧法界一相等又真如門及真如體相中具說何故下對以成難意云衆生真如卽同佛體但念真如便可得道何用別更修諸行耶斯乃但可只用直心不合更說後二△初喻論摩尼等者寶體雖淨而相不淨故要治之△一正合論真如等者約體雖本來空寂約相則現有塵勞若不起行對治無以得同諸佛將

知佛與衆生但體同而相不同也衆生相則六染熾然諸佛相則衆善普會霄壤之遠何可雷同故天台圓教具明六卽卽故真如平等六故行位元殊豈同闡證但理而已故宜修進蠲去塵惑若其但念未免沈空止觀相須方爲佛法目足之喻不可思焉△二委釋論以垢等者謂衆生從無始來背覺合塵於色聲等一切法上起貪瞋等無量煩惱諸垢染法今既覺知過患宜起對治所治之垢既多能治之善寧一其猶病多藥非一種故修一切行也金剛亦云以無我無人修一切善法則得阿耨菩提等△三順眞論

自然等者諸不善行旣違真理一切善行誠宜順眞疏外違等者如行布施外違慳貪內順無慳乃至般若外違無明內順明體也重顯方便者以前答所問云不以方便熏修終無得淨今此重明所修方便前但發心未行其事今茲所說正是所行則前爲能起之心此爲所起之行故前疏標皆言行本應知前文但顯發心相此明修行相△一標數論言方便者汎論有四種一進趣方便二權巧方便三修行方便四集成方便此文正當一三兼於二四也△疏注文三者如次是前三心所起之行前後相對如文可知初

科不住道者兩意一者不猶無也道卽因也無住之  
因行故故本疏云無住行二者道卽真如性此性本  
無住故二意合論方同論旨蓋以性本無住故以無  
住之行而隨順之論一者下標名行之方便卽根本  
故以明此科與後二利行爲根本爾論謂觀下正示  
下皆倣此疏智者若見諸法有生滅卽成凡夫妄識  
是住生死當知反此宜稱爲智亦卽依真如不變義  
修止行也論因緣等者若染因緣和合卽惡業苦果  
不失若淨因緣和合卽善因樂果不失斯則染惡等  
唯三塗淨善等通人天二乘及佛道也起大悲者旣

見因緣和合善惡果報故可翻迷成悟轉凡爲聖乃  
起大悲咸欲濟度修福等者具修施戒忍進禪定以  
攝衆生謂布施攝貪窮持戒攝毀禁等以此五行是  
福德門故斯則爲化衆生而修福德因利他而自利  
也故淨名云衆生之類是菩薩淨土等不住下若住  
涅槃則一向寂靜旣言化生修福當知不住亦是依  
真如隨緣義修觀行也以隨下明所以法性本來非  
有故今不住生死本來非無故今不住涅槃又以性  
不變故不住生死隨緣故不住涅槃乃至凡聖斷常  
一異等諸二邊法不可盡言離此二邊方名隨性今

以卽悲之智爲自利行本以卽智之悲爲利他行本  
又此一文卽以一心三觀義同謂觀法無生卽空觀  
觀真諦也觀因緣和合卽假觀觀俗諦也隨順法性  
卽中觀觀第一義諦卽三而一卽一而三不縱橫竝  
別諦觀皆然△斷德中疏勤斷二惡者已起之惡斷  
令不續未起之惡斷令不起止持者以約惡法而論  
故止名持作名爲犯論慚愧者卽善十一之二數慚  
謂尊貴增上崇重賢善羞恥過罪息諸惡行愧謂呵  
厭增上輕拒暴惡羞恥過罪息諸惡業悔過者梵語  
懾摩此云悔過謂陳露先罪改往修來於中能止一

切惡法六字通已起未起餘皆局於已起也是惡皆  
止故云一切此文已起之惡旣令不增未生之者自  
然不起論以隨下明所以性本離過起過則違今旣  
止之故當順理過盡性顯名爲法身法身卽是斷德  
故今疏中以此名科△二智德疏勤修二善者已起  
之善修令增長未起之善修令發生故今文云發起  
增長是標二義也作持者謂約善法所論作故名持  
止故名犯論供養者然有三種財法觀行禮拜者勒  
摩三藏說有七種一我慢禮二唱和禮此二非儀三  
恭敬禮敬從心發運於身口五輪著地四無相禮深

入法性離能所相五起用禮觀身與佛同一緣起如幻如影普運身心徧禮一切六內觀禮但禮身內法身真佛不緣他佛七實相禮若內若外若凡若佛同一實相見佛可禮亦是邪見觀身實相觀佛亦然名平等禮敬故文殊偈云不生不滅故敬禮無所觀準離垢慧所問禮佛法經總有八重一供養二讚歎三禮佛四懺悔五勸請六隨喜七迴向八發願八中正意禮佛餘七皆是禮佛緣由謂供讚是禮佛流類懺勸隨喜是禮佛之意七是都迴禮等功德向於三處八是敘陳意所希望然此八重各能除障供養除慳

貪障感大財富讚歎除惡口得無礙辯才禮佛除我慢得尊貴身懺悔除三四障得依正具足勸請除謗法得多聞智慧隨喜除嫉妒得大眷屬迴向除狹劣成廣大善發願除邊屈總持諸行今此文中具有五法前文有懺悔後文有發願然闕迴向影在文中也約緣修行者約三寶勝緣修入住正行愛敬四句可知若準儒教說母唯愛君唯敬父兼愛敬故孝經云資於事父以事母而愛同資於事父以事君而敬同故母取其愛而君取其敬兼之者父也然此且約多分而說今以事父之心奉於三寶故兼愛敬論淳厚

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

者鄭重<sup>厚</sup>之心而無襍亂<sup>淳</sup>亦有四句一淳而不厚謂楚時誠懇二厚而不淳謂長久渾雜三俱謂沒齒無乖四不俱謂輒無虔想今取第三也論信增等者從十信位遷入正定也此則內因修行力又因下外緣加護力亦可前名生智益後名滅障益消業等者前禮讚等各能除障已如前配復能成善如下第四分中所說論以隨下明意性本離其癡障今以修智斷障豈非順性此行成就卽顯報身報身卽智德故爲此科△利他行中論發願者發謂策勵運意願謂希求樂欲然有四種要約其心故名誓願今此段文

卽四中之一也餘之三願已在前文謂能止方便及消障離癡卽無邊煩惱<sup>淳</sup>言願斷發起善根增長方便卽無量法門誓願學行此二法皆爲菩提卽佛道無上誓願成也疏長時心者度盡爲期不限劫數故盡來際廣大心者無有揀擇四生九類悉皆度故第一心者超過人天二乘之境令得無上寂滅樂故論以隨法性下次第釋前三心所以初二句釋長時心謂法性常住無始無終故今度生盡於未來無有疲厭而隨順也疏文可解論法性下三句釋廣大心謂性徧滿平等無二故今化度無有揀擇平等濟拔而隨

順也不念下二句釋第一心謂性本無彼此分別常寂靜故故今化令咸至寂滅究竟涅槃是順性也然後之二段釋所以文但初標法性後結故字而不逐段一一標結隨順等言者譯人巧略也疏二明下指後二段文意可知亦常心者意明此文有究竟寂滅之言故名常也然與長時實有相濫智者詳焉△發心利益者由前發心行諸妙行故得入初住見於法身起用利益也一顯勝德疏依人空見者以於人空得自在故若約法空但相似見未是證故名少分若依人空此卽已證但未得法空故名少分此約兼

明非今正意發心住中作此事者隨其悲願之力能作八相成道利樂衆生同今釋迦化儀也此如華嚴所說然此科中有自利利他之異詳之可見若前後相望說者由佛菩薩教故發直心行無住行由護法故發淡心行自利行由大悲故發大悲心行利他行又由自利行故得見法身由利他行故能現八種等△二微過中疏未證等者但比觀相應未離分別故異所以者此明先世所造世間業因通於善惡斯往業不亾也論微苦者二意一者變易行苦二者隨業有分段苦以得自在不同凡夫故云微苦修短等者

變易之身願智所資無定齊限能變麤身爲細質易  
短命爲長年故云自在留惑等者以有大願故留煩  
惱不斷潤生受報以有大智故能自在隨意長短不  
爲惑染非同凡夫爲煩惱所使不能斷也斯則未名  
法身故異地土以其下是所以非業繫故異凡夫以  
有下是所以旣上異聖人下殊凡品故當賢位△三  
通權教疏縷絡下引所舉教七住前退者第七方名  
不退住故然彼經文但說淨目等各至第六住遇惡  
知識緣故退而不說彼所值因緣行相待檢續入今  
釋下明釋通意今詳論中未入正位者通其兩意一

則未入初住二則未至七住正因不退之位故云正  
位前意爲正△四歎實行疏於下不戀者謂於二乘  
凡夫果報不生著故論若聞等者如法華云佛道長  
遠久受勤苦乃可得成疏於上不怯者於菩提涅槃  
有勤勇心修諸苦行不生畏故釋所以者亦釋不戀  
所以以知自性涅槃終非外得遲速由已何定劫時  
故雖聞是言而無怯懼斯則以於上不怯故於下不  
戀是故疏中但釋不怯所以也由此兩文之內皆有  
不怯之言此卽下據此以序彼此明其實非權說故  
△一總標論解行等者謂依住行位滿發深解行入

十向位非同前信故云轉勝△一時勝疏隣初地者從初住至初地爲一僧祇今十迴向與初地相近是隣真故△一總疏解者解徹真如故云漢解分明顯了更無闇昧故云現前又超前故云漢異後故云解也行者真如無相順真如故所行之行一一無相如金剛不住色布施不住聲香等布施諸行皆然故云離相△二別論無慳貪者慳謂吝惜已物輒不與人貪謂希欲他財以將入已知法性之中本無此事故疏云解也論檀波羅蜜者具云檀那此云布施波羅蜜此云到彼岸彼岸卽是涅槃涅槃卽是真如之理

今離相行施與理相應則是到彼岸義餘皆倣之然則輟已惠人名之爲施但順無慳以此亦順無貪之義何則已物尚與他人他物固應不取以漢況淺也謂離下明所離相三輪卽施者受者所施之物達此三相體不可得故名離也苟能離相則因成無漏果證菩提有運轉義故名爲輪復能摧輶一切惑障有摧輶義號爲輪也以十下釋離相之由得法空者但約深入此觀未是證得然此由是約教道說若其實說十信位中便能深入如下信心修真如三昧豈非法空也發心所依者解卽十住行卽十行斯則十向

爲能依住行爲所依又住行爲能發十向爲所發謂  
 依此解行發迴向心故以垢下釋順真之由謂慳等  
 是障常乖背性性本無慳等常不與障合故行布施  
 等行外違慳等障內順無慳等性也論五欲者色聲  
 香味觸等五境此五能令衆生起欲心故前云以  
 有妄境界染法緣故則熏習妄心令其念著造種種  
 業受於一切身心等苦又無常經云常求於欲境不  
 行於善事於境生欲故名爲過過卽是染知法性中  
 本無此染也尸者具云尸羅此云戒戒謂防非止惡  
 卽離五欲過也論瞋惱者因他惱觸生瞋恚故亦可

因惱生瞋惱故熟惱熟惱卽苦知性本無此苦也羼  
 提此云忍辱忍彼辱境卽離瞋惱論懈怠等者爲執  
 身心遂成懈怠今旣性淨不見身心爲誰懈怠故云  
 離也毗離耶此云精進精謂精純一心無襍進謂進  
 趣勇猛不退卽離懈怠論常定約顯體說無亂約離  
 過說禪者具云禪那此云靜慮卽慧之定定卽無亂  
 論離無明等者本覺明中本無不覺故般若此云智  
 慧智慧卽是明明卽離無明也卽定之慧故此與第  
 五是自性定慧本是一法但約體用義分異爾然準  
 華嚴說十地菩薩如次行十波羅蜜行者以彼是證

80 1 2 3 4 5 6 7 8 9 10 1 2 3 4 5 6 7 8 9 10

真之後如實修行此中六度是隨順修行淺深有異△一標地依者以文云證何境界所謂真如此則真如是十地所依境也然地者就喻彰名以喻真智能生聖法今約真如是智所依故名地依論證發心等者然此十地菩薩雖斷障有分數多少行行有差別淺淡隨其位次一一皆證其所證者同一真如但有滿分之殊而無差別之唯是故此通標真如爲所證境界也華嚴十地品中亦此說故彼出體偈云如來大仙道微妙難可知非念離諸念求見不可得△疏根本者卽根本智證真諦理是真見道也論以依等

者或問曰真如離心緣相又若證者離於能所何以言真如爲境界耶故此釋之疏必依轉相起者卽此轉識約現境處便名現識竟無別體但據次第義說相依斯則依能見心有所見境故前論云以依能見故境界妄現本智證者智與理冥心與神會一相一味平等平等實無能所之異故頌云若時於所緣智都無所得爾時住唯識離二取相故今但下對此重解依轉識說爲境界之意此有二義一約菩薩未離業識猶有見相入觀雖與無分別智相應不分能所出觀則與此識相應約此識上說前證時以爲境界

二約後得智中相見道內重慮緣真變起影像彷正  
證時說真爲境此但似境非謂實有然亦不離是轉  
識現故疏雙標後得智中業識未盡也然至釋相但  
約業識未盡義說故云轉現猶存等也以後得出下出  
第二義或問曰如上所說業識未盡是卽聞命後得  
智中如何分別故此釋之意明根本實證之時但是  
一心真見道無分別能所之相若後得智中以能見  
心反緣所證以有此能緣心故便有真如影像當情  
爲所緣境界像雖不實還似真如祇據此義說後得  
智中依於轉識名境界也如人飲水正飲之時不能

其冷暖飲水之後方得說之說時雖不得水體其  
如所說之水還似所飲之水也而實等者真如是所  
證智是能證能所無二方名法身以法身本具理智  
理智本無二故斯則住唯識理離二取相也△三明  
用疏後得者權智達俗出假化物一中論一念至無  
餘世界者若準華嚴說初地菩薩能至百佛世界二  
地千佛世界乃至十地不可說不可說阿僧祇世界  
此蓋隨其分位勝劣不同今此文中意在通論十地  
故以無餘之言而通貫之也疏請法者於彼彼世界  
彼彼衆中勵已率先爲衆導晉請佛說法請意者新

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

譯論云唯爲衆生而作利益非求聽受美妙言辭夫請說法誠在所顯修行義意令其衆會如聞攝取思而行之兼冀展轉遐益衆生豈徒聽言辭而已耶則如圓覺十二菩薩各伸請問皆言願爲此會及爲末世等△二中疏促等者謂有一類衆生根性怯弱聞說佛道長遠久受勤苦乃可得成却生退屈不肯修進是故菩薩爲此衆生示現超越位地不經劫數證於佛果令彼思齊發心進趣如釋迦六年修行便成正覺是茲例矣又如善財一生龍女一念等延等者爲有一類衆生亦欲進趣將謂佛果容易而成懈

怠因循不能勤勇若復示其超果轉令懈慢終不成就是故菩薩爲彼說言我於無量劫中修行方成佛道以茲警策不令懈怠使其勤進故法華云智積菩薩言我見釋迦如來於無量劫難行苦行積功累德求菩提道未曾止息卽其類也然促中云示延中但云說者促在一生可令現見延歷多劫但說令知也結者根器旣多方便非一口不可說心不可測故云無數等故法華云佛知衆生有種種欲深心所著隨其本性以種種因緣譬喻言辭方便說法如此皆爲得一佛乘一切種智故是諸衆生從佛聞法究竟皆

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

得一切種智△三中論種性根等者等謂齊同同是一乘種性非三五等乘性故根謂信等五根有上中下今同是上根非中下故此二約答所論故疏云因等也疏行等者同發菩提心行二利行故若克就地上則同得無分別智行如次同行十波羅蜜行然此發心之言通於前位所說證等者同證二空理故若克就地上則同證徧行真如乃至十地同證業自枉所依真如等論無有超過之法者此明菩薩因行證等既同更無別有超越殊勝之法可爲行證也亦可此是位等卽三賢十聖皆須歷故無有超過以一切

下是時等論疏易解據此亦似通明上諸等之所以詳之可見論大意云若一種是菩薩種性根器則發心修行斷證位次始終劫數竟無差別也所言阿僧祇者若準本業經初以忉利天衣仍用彼天時分三年一拂盡四十里石爲小劫次以梵天衣拂盡八千里石爲中劫後以淨居天衣拂盡八百里石爲大劫襍阿含中與此有異又劫章頌云風災爲一數乃至不可知此極長遠時名一僧祇劫謂以此風災爲數數至不可數更若數時心則狂亂齊此數不得處名一僧祇若以此等計三僧祇方成佛道則百千萬人

中無有一人發心修進縱有懼於三塗苦者但修人天戒善或有畏於三界生處亦但修二乘之行焉敢希冀佛果修菩薩行蓋爲作此長久而解有是大失今所會通則特異於彼何者且梵語劫波此云時分大劫小劫長時短時下至刹那皆名時分阿僧祇此云無數無數之言亦不定久近如人經年不相見便云無數時竟日不見亦云無數時修行時分意亦同此謂始從具足凡位發心修進法爾經無數時方得親證真如名爲見道是一無數時從見道已去漸斷俱生三障法爾又經無數時方得不假功用自然相

應至第八地是第二無數時從此任運進趣消遣餘累法爾又經無數時方得成佛是第三無數時斯則無數時是定有然延促不可定也若此所解方有修行之人況時無定體唯心所現故法華說日月燈明佛說法華經六十小劫時會聽者謂如食頃又論釋經劫數之言或云年歲或日月等又攝論云處夢謂經年覺乃須臾頃故時雖無量攝在一刹那△四中論衆生世界不同者或分情器或唯有情通茲二意以世界及衆生各有無量差別故所見等者爲彼彼衆生根機種性樂欲不同故示所行業用乃至現身

說法各隨彼見聞差別也例如觀音妙音品說△發心相中疏二智所依等者此二種智本從彼識之所顯生故說爲依非謂現今能與二智爲體問二智是淨梨耶是染云何淨智依染識生耶答以有染心故翻此染心得成淨智若本無染淨亦不生故前云以有不覺妄想心故能知名義爲說眞覺若離不覺之心則無真覺自相可說廣如隨染本覺二相中明也又梨耶是染淨和合淨智依生故無疑也又若隨相所明謂梨耶本有二智種子從無始來以本識爲依止處故云所依也理實等者旣言梨耶合通三細

今但言業識者意在舉細攝麤舉本攝末也亦可現相八地盡轉相九地盡業相十地盡業相最通故標通者斯則於諸菩薩無所屈矣此非下或問二智是淨從來未得今始開發可名發心相生滅業識無始來有何故至此名發心相耶故此釋之意明此菩薩亦能證真亦能達俗亦有生滅以證真故據異地前以有生滅不同佛位其猶鍊金兌色漸顯麤鑛已落細鑛猶存欲顯此時應云幾分是金幾分是鑛斯則不同麤鑛亦異純金故且通說金已顯發此亦如是△一總中疏現報等者卽以此身成正覺故卽自受

用身功德圓滿也論色究竟處者色界之頂是色邊際故最高大身者色究竟天身量一萬六千由旬自在天王身量三萬二千踰善那十地菩薩示爲自在天王身量倍增故云最高大也色身之大莫過此天故疏後報等者依前報體方起此故卽他受用身功德亦圓滿也然其因窮果顯但義說二相時無前後現後二報亦復同時譬如夜盡卽曉豈分前後摩醯首羅此云大自在智處者一切智人所起智處故經中說摩醯首羅於一念中能知三千界中雨滴之數何故下牒難一義下釋通十王等者準仁王經說十

信菩薩鐵輪王王土八  
聲一闍浮提十住菩薩銅輪王王二天下十行菩薩銀輪王王三天下十向菩薩金輪王王四天下初地菩薩閻浮王王百佛土二地菩薩忉利王王千佛土三地菩薩夜摩王王萬佛土四地菩薩兜率王王億佛土五地菩薩化樂王王百億佛土六地菩薩他化王王千億佛土七地菩薩初禪王王萬億佛土八地菩薩二禪王王百萬億佛土九地菩薩三禪王王百萬億阿僧祇佛土十地菩薩四禪王王不可說不可說佛土如來法界王王無量佛土說一切法門卽彼經除佛有十三法師兼信十四及

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

佛十五今疏不論地前及果位故但十王然第十下顯最後身菩薩示於彼天成佛之相卽轉第十地菩薩身以爲佛身若準真實成佛但當前云功德成滿卽無方所亦不可見今爲應於十地菩薩故示彼天說成正覺餘義如別說者以此菩薩示成佛時於第四禪色究竟頂自枉天上有妙淨土出過三界十地菩薩當生其中菩薩坐於大寶蓮華其座縱廣百萬三千大千世界於蓮華外有十三千大千世界微塵數小蓮華座以爲眷屬各有菩薩而坐其上是大菩薩放十種光謂於足下出百萬阿僧祇光明照十方

世界一切地獄乃至第十頂上放若干光明照十方世界所有諸佛光繞十匝住於空中成光明雲綱臺尚廣嚴淨於光明中悉雨寶香寶珠纓絡諸莊嚴具供養諸佛光明入諸佛足下爾時諸佛一時同放白毫相光照大菩薩其光卽入大菩薩頂又放阿僧祇眷屬光照眷屬華座諸小菩薩其光各入諸菩薩頂已應時得佛無量三昧應時得佛無量智慧卽得佛位墮在佛數復有五意故枉彼天一以二乘人執化八相爲真佛不信別有聖人又不知卽心是佛又信彼第四禪中是聖人生處今且同與二乘在彼天處

攝示令知八相非真故在此天二緣三災不及故當此天三緣欲界色質麤重是有無色界都無色質是無今此天中表離有無契於中道故在此天四爲摩醯首羅天王面有三目不縱不橫表證三德涅槃亦爾故在此天五爲下界慧多定少上界四空定多慧少此天定慧平等故在此天以禪者翻云靜慮靜揀於下慮揀於上偈云欲界及無色佛不於彼成色界中上天離欲中得道△科云別者前但直顯德滿位彰今則具明二智滿相及顯無明頓盡等卽是明前心相中二心圓滿一心滅除也疏始覺等者此始覺

慧與本覺心源最初契合之時名爲一念此約究竟相應發始之一念不是暫時相應謂之一念又此一念前則屬因此一念後則屬果其猶暗色在朝夕之端矣無明等者無明未盡旣有所不知無明若盡則無所不照卽大智慧光明徧照法界也一切諸法種類若干無不知之故云一切種智故大般若云煩惱不生名一切種智若具言之得三種智謂一切智道種智一切種智準天台說因修一心三觀果得一心三智謂修卽空觀得一切智修卽假觀得道種智修卽中觀得一切種智今此論中依真如門修奢摩他

即是空觀果得一切智依生滅門修毗鉢舍那即是假觀果得道種智此二雙運爲禪那即是中觀果成一切種智今論舉中所成以攝空假故但云一切種智亦可等者謂此始覺慧至心源時約斷惑邊名無間道約證理邊名解脫道卽顯等者謂前發心三種相中真心彼有業之所累猶爲菩薩至此業識永盡無餘唯真獨存更無所累故名佛也上皆下同上二報利益但前標此釋非別有說顯上方便者卽前發心相中後得智至此圓滿也問前後皆言自然則因果何別耶答前是有心自然以帶業識故此是無心

自然唯真獨存故昭然可解又亦下類攝前文前約法說此約人說理無別也皆是下釋類攝所以以前文是本覺隨染之文今顯果位亦卽本覺隨染二文既同故應相攝其實亦同四鏡中之後二也雖約性淨隨染爲門之異而法體無別

### 起信論跋筆削記卷第十七

音切

壤

如掌

古玄

蠲

古玄

疾

慈栗

丹故

輒

猪

輒

彷

薄光

等

切

古猛

曖

市據

華亭侯王陸彦祖質刻此

起信論跋筆削記第十七卷

嘉興沙彌道

梅對

貞州王國英書

長洲吳子章刻

萬曆辛卯春清涼山妙德庵識

法華經疏解

增補卷第十八

問始點時其質亦同四難中之第一也。難除卦文是本貴重於文今賜果並在咱本貴重於二爻去始此餘人萬聖無限也。晉書卷一百一十一載晉惠帝以造自然劫真醫并姑罪然可憐又亦丁陳氏謂文

起信論疏筆削記卷第十八

長水沙門子睿錄

△問中二一陳疑可解○二設難疏非直等者意云所知之境既甚多無量縱有心在早自難知豈況永斷心想却能了別而名一切種智耶△立理疏意云等者總敘答意卽反於所問義在次下論一切下立二正理一元是真心故論云一切境等也謂諸法唯心無外境界今證心源是合了知誠無疑慮二本來無念故論云離於想念也謂旣本是心元來離念唯是眞實今以離妄方了此更無疑故下論文但反此

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

二意爲失合此二意爲得也疏境雖下釋前意真心  
下釋後意竝可知之然此論中且是立理未顯能了  
能知疏中要意圓備故預結之云了知也若於此中  
體知論旨下文逐段自然無惑仍更隨釋彌爲彰顯  
△顯失論文此中有二反前正理故成不知之失一  
迷本真心故論云以衆生等也諸法本來唯心以衆  
生迷本唯心妄見有境以妄見有限齊故遂令境有  
分齊所以不能徧知也此卽對前第一本來唯心以  
顯其失疏見有限等者境卽無限但能見之心有限  
故論云心有分齊不言境有分齊二妄起想念故論

云以妄起等也謂一真心本來無妄常住法性以衆  
生妄起想念違於無妄不稱真性所以不能徧知也  
此卽對前第二離於妄念以顯其失疏二釋成等者  
據論二段總是對前釋成失義不唯此文詳之可知  
卽明等者性本離念妄起想念卽是乖真以乖真故  
不能了知不了知言貫通前段義則顯矣△論諸佛  
下至諸法之性者卽雙反前非合初正理也文有二  
段初反前彰得二初總顯也謂總反前非以彰其得  
論諸佛至不徧者離見故反前妄起想念之失合初  
離念之得離相故反前妄見境界之失合初一心之

得既合正理卽能徧知故云無所不徧也疏無妄等  
者釋前離見也離見卽能離相故現一義也○論心  
真實下二別結初一句結離見也旣離妄見卽是  
心心卽真實也疏文可見論卽是諸法性者結前離  
相也旣離妄相唯是於性性無不徧也旣無二非之  
失卽成合理之得正理旣合不了何待由是科云舉  
是彰得也然此下釋法性義以本依如來藏有生滅  
故生滅是法如來藏是性今從生滅門入真如門故  
離見相卽顯法性性卽本覺立義分中指爲自體也  
○論自體顯照下二約義結名也疏一切下貼釋可

知故上等者引因以證果卽用大中文前則因心現  
果法今則果心現因法因果雖殊心體是一故金鉢  
云阿鼻依正全處極聖之自心毗盧身土不逾下凡  
之一念良以下釋所以生佛體同無二相故猶如父  
子共有一鏡若照子時子在父鏡中亦在自鏡中若  
照父時父在子鏡中亦在自鏡中鏡是一體攝屬二  
人各成自鏡互照互現無別有體以喻真心生佛各  
具雖云各有而理不可分疏云無二是斯意也華嚴  
下引證三無差別謂衆生心卽佛心佛心卽衆生心  
又衆生是佛心中衆生佛是衆生心中佛以生佛相

同一心體無差別故以同體等者意云匪但心體照法而已復能起大神用利樂衆生斯則依智淨相起不思議業相依法出離鏡作緣熏習鏡義也△問中論若諸下至生者是牒前文也一切下至得利是按定也皆可解多不見者非全不見故云多也又聞說者必見身見身者未必聞法今約局所標故但言不見尚不得見何況得聞△答中三一法論諸佛下據前所問卽問報化今約法身體徧故報化是卽體之用亦徧一切據本而言但云法身也疏徧衆生心者論云一切處故一切之言意說情器亦如華嚴云法

性徧在一切處

橫說

一切衆生及國土

別顯  
情器

三世悉在

無有餘

說

亦無形相而可得

述

據此則不唯徧於衆生心今疏且約所問之處故但言徧衆生心也但有

等者此則功過在機佛無私應故華嚴云菩薩清涼月游於畢竟空衆生心水淨菩提影現中上文等者卽用大中七重問答廣明斯義○論衆生下二喻也應更合云諸佛之身猶如色像論舉一隅故不具說○論如是下三合疏明無等者意云論言垢者但是障見佛之垢卽是無機善星下引例此人生於佛世是佛弟子常見佛身然有煩惱現行以起惡故生墮

地獄如涅槃說○論法身不現下疏文三今初約本論以通能現然據義合云報化不現而言法身不現者以約本說故如言鏡不現者謂不現像也此同圓覺云由寂靜故十方世界諸如來心於中顯現心卽法身皆是據本說也又應化亦名法身本業經云法身二種一法性法身二應化法身謂第一諦法添水中從實性生智故實智爲法身法名曰自體集藏名身一切衆生善根感此實智法身故能現應無量法身所謂十種身等○疏如攝論下二引他論以明不現三初引本文十二甚深者一受生甚深二安立數

三現等覺四離欲五蘊六成就七顯現八示現等覺涅槃九住十自體十一斷煩惱十二不思議今言顯現卽第七也合移彼字安顯現字上文卽順矣餘如次釋○釋曰下二引釋文此亦論文今疏隨引便爲解釋初標也而世間下徵譬如下釋先喻如是下法合奢摩他此云止也輒滑者非麤惡過失故則戒如器水如定戒能資定故以譬之過失者如前破器以有破戒垢故定水不停佛月不現也華嚴經中亦同此說○疏此中下三會文意初牒前文是過去下正顯意以散下出所以如阿難唯好多聞何曾有定不

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

妨給侍如來後遭石室之呵亦緣無定不能斷結又諸菩薩例皆慧少定多得見佛者無限皆斯類也○彼攝下對辯二文之旨此論下明此論意竝可知此義亦於因緣分中已說△修行信心分者修謂學習行謂進趣所行五種如下自辨信心者起忍樂意境有四種亦如下辯來意等者此約論題所配若準立義分中所立卽與分別發趣道相竝當乘義△標意疏勝人卽前發直等三心行不住等四行人正定者劣人卽前見佛色相或是二乘發人天等心却邊失者以四信等者意不令信佛僧等色相起人天二乘

等劣行還依等者信旣成滿應如前文發直等三心修無住等四行人於十住乃至獲利更發解證等心也斯則前雖揀退今卽教修也△標數中疏四不壞信者信彼四事皆不可壞不壞卽常住也以所信之境不可壞故使能信之心亦不可壞能所相稱俱名不壞故經云妙信常住是也△列釋中疏諸佛所師者約人顯根本也謂佛因地本於真如起於信解又依真如軌則修行又乃證極真如方得成佛故華嚴云以諸如來尊重法故以如說行出生諸佛故約此義邊故云真如是佛師也故經云諸佛所師所謂法

也以法常故諸佛亦常既是佛師故名根本衆行下  
約法顯根本謂一切行門皆從真起故圓覺云無上  
法王有大施羅尼門名爲圓覺乃至流出諸波羅蜜  
教授菩薩等所以前標直心爲二利行本是知非真  
流之行無以契真何有契真之行不從真起此乃爲  
信等諸行之根本也問何故不約僧顯根本耶答約  
佛顯時已攝僧故因地信解軌則修行即是僧寶今  
疏文雖有二義必兼三故約能生三寶名爲根本也  
又是所信法中之根本故以終敎所宗唯此真法萬  
緣所起起自真如會緣入實入於真如菩薩發心先

緣真如起信發解修行契證咸歸真如故於所信法  
中爲根本也信若不信真如信則名邪故寶性論云  
不信真如有五種失謂自輕輕他執人執法起惡見  
是知反此則爲五得由是發心先令信此非直等者  
不但起信亦乃樂觀樂觀卽行也然此行是卽信之  
行行所成信方爲實信故問云何是信真如之相耶  
答不信一切法是信真如之相也以真如理中本無  
諸法若見諸法爲有是信諸法不信真如今則不信  
諸法是信真如也亦可樂念觀察方名爲信如世間  
人勸彼所作彼順所勸方名爲信若不爾者焉爲信

耶故信則所言之理順順則師資之道成矣故以樂  
念釋成其信論信佛等者是信報身謂身語意業法  
門辨才色相具足依報莊嚴故云無量功德故前論  
云身有無量種種莊嚴常念等者以信佛有功德故願  
亦有無量種種莊嚴常念等者以信佛有功德故願  
成此身具一切智以願求故而念恭敬供養起於善  
根修佛因也論信法等此是行法此法能除慳貪毀  
禁等障是大利益常念等者卽施戒等六度以信有  
益故復勤而行之論信僧等者此是登地已上大菩  
薩僧故云正修如實等也常樂等者揀非二乘故云

菩薩揀非地前故云如實修行然常途四信謂信三  
寶及戒此卽人天乘中之信今之四信乃是終實教  
中不唯真如與戒不同亦乃三寶淺深有異問前說  
善根微少者亦遇佛見僧求法與此何別答前以未  
信真如故所見三寶皆不稱實由是遇緣却成邊失  
今以先信真如故得所信三寶悉皆如實由是增進  
使信成滿也斯則信真如爲佛本信佛爲所成信法  
爲所依信僧爲所學又此四種卽是教理行果前三  
如次是理果行信僧卽教也僧能轉教就彼求學故  
疏各二等者詳論可知△舉數中疏有信等者信若

無行非實信也以信是順義順而行之乃爲真信將  
知此行是成信之行信是卽行之信此信則決定不  
邊也如前所邊者不能如此故△徵起中疏止觀等  
者以諸經論皆說六度此中唯五者以後二修時不  
得相離故初修爲止觀修成爲定慧但時異而體不  
異也問何故止觀合修耶答若不雙修皆成邪故涅  
槃經說定多慧少不見佛性慧多定少見性不了定  
慧等學明見佛性又諸處說不見佛性無明邪見自  
此而生故今合修免招二過下文自釋△施中論一  
切來求索者卽受施人也不同善德局七種人故云

一切則不擇冤親老幼病健高下貧窮遠近等所有  
下是所施物隨力之言似有兩意一隨貧富之力二  
隨捨施之力若隨其力必不強爲免生惱也以自下  
卽行施意自捨慳貪者隨性行檀是自利行令彼歡  
喜者濟物垂惠是利他行故知菩薩雖舉一行二利  
已兼此則以布施攝貧窮也疏資財施者資身之物  
故亦名外財身外物故亦名資生財資於生命故準  
正法念經說十二種垢施一於衆生不平等施二爲  
男女欲因緣故施三有所怖畏施與王者而求救故  
四以癡心施如外道齋會等五不知業果但學他施

六乞者苦求方與七知他有物施之令信後得侵損  
八施物囑之令破和合共爲一友後與乘惱九與男  
女物令使成親或令男與女或卽反之十賤買諸物  
於齋會日貴價賣之少分饒之十一爲名稱故施十  
二妻子饑貧與物離此十二卽名淨施除此復有十  
二種具足施不能繁述優婆塞戒經菩薩行施應離  
五法一施時不選有德無德二施時不說善惡三施  
時不擇種姓四施時不輕求者五施時不惡口復有  
三事施已不得勝妙果報一先多發心後則少與二  
選擇怯物持施與人三旣行施已心生悔恨離茲三

事其果勝妙論厄難恐怖危逼者受施人也隨已堪  
任者所施力也盡力所及不惜不吝施與無畏者正  
行施也亦是行施意或縲紲之難或水火之災或狼  
虎之殃或冤家之怖如是一切衆生凡有所畏之事  
皆護令安樂得無所畏若有衆生來求法者卽受施  
人三乘五乘或請或問皆名求法隨已下所施法不  
能不解者輒不與言於能解處卽與說之方免誤人  
亦免尤難孔子曰知之爲知之不知爲不知是知也  
又云多聞闕疑慎言其餘則寡尤方便說者要以種  
種言辯巧便引勸使其信受不得直置令其誹謗故

法華云有問難不瞋隨順爲解說不應下明行施意  
不貪名利等是反明其非故前論云所謂爲令衆生  
離一切苦得究竟樂非求世間名利恭敬故唯念下  
順明其是自既如此令他亦然準智論云佛說施中  
法施第一何以故財施有量法施無量財施欲界報  
法施出三界報財施不能斷漏法施清升彼岸財施  
但感人天法施通感三乘果財施愚智俱能法施智  
人方能財施唯能施者得福法施通益能所財施愚  
畜能受法施唯局聰人財施但益色身法施能和心  
神財施能增貪病法施能除三毒由是比較法施第

一願諸學者審而行之△戒中論所謂下如次是其  
十善則離身三口四意三之惡也不殺者普該蠢物  
不唯於人不盜者一針一艸不但五錢已上不姪者  
觸身卽犯不論道與非道兩舌者鬪構兩頭惡口者  
無稽之語妄言者虛誑之語綺語者粉飾之談此等  
立無故皆言不貪謂惡欲嫉謂妬忌欺謂陵犯詐謂  
虛僞誚謂罔冒曲謂違理其嫉欺恚是瞋之分誚曲  
是貪之分邪見者亦名惡見卽身邊等五見也今言  
邪者五中之一此等立無故云遠離然菩薩以慈悲  
愍物故殺戒爲先小乘以厭離生死故姪戒爲首旨

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

趣有異故教儀不同若據十善本是人天因緣今菩薩所修趣果則異準華嚴經說有五等人皆修十善因果不同謂凡夫聲聞緣覺菩薩及佛淨名云持戒是菩薩淨土菩薩成佛時行十善道滿願衆生來生其國十善是菩薩淨土菩薩成佛時命不中夭大富梵行所言誠諦常以軟語眷屬不離善和諍訟言必饒益不嫉不恚正見衆生來生其國故知十善不異修心不同也然行十惡準俱舍說各招三種果一異熟二等添三增上異熟可知略辨餘二殺生中一等流果者壽命短促二增上果者兇澤鮮少偷盜中一

財物匱乏二多遭雷雹邪行中一妻不貞良二多諸塵埃妄語中一多遭誹謗二多諸臭穢兩舌中一親友乖穆二所居險曲惡口中一常聞惡聲二田多荆棘稼穡匪宜綺語中一言無威肅二時候變改貪中一令貪熾盛二令少果瞋中一令瞋熾盛二令果麤辣邪見中一令癡盛二令無果此皆初是等流二是增上也疏攝律儀者此殺等十是惡律儀止之不行卽成善法攝取不捨卽名爲戒論出家等者前律儀戒卽通在家出家此善法戒則唯出家者爲折伏下處靜之意若處人寰難斷煩惱故須脫俗離塵燕居

林藪故遺教經云於閑靜處思滅苦本念所受法勿令至失月藏經中廣有此說且釋迦如來捨王室詣雪山因行六年果圓萬德坐斯軌者蓋爲此也少欲等者見得思義故云知足財無苟得故云少欲頭陀此云抖擗謂抖擗三界煩惱業報故然有十二種謂衣三食三六依處說處六者一住空閑處謂離衆閑居阿練若身遠離故心離欲益益諸善故二端坐不臥謂若行若立心動難攝然亦不久應受常坐若欲睡時脇不著席三樹下坐謂順佛法故如佛成道轉法輪入涅槃皆在樹下能治房舍貪易入道故四壞

間坐謂塚間常有悲哭聲歟屍狼藉無常不淨觀道易成五露地坐謂樹如半屋愛著猶生又雨濕鳥喧汚穢不淨若露地處光明徧照令心明利空觀易成六隨有艸坐謂隨心所得而坐其上離所愛著不惱他故食中三者一常乞食謂依法乞當制六根不著六塵亦不分別男女等相得與不得若好若惡不生憎愛若請食者或得不得貪恨易生若同僧食處分使人心則散亂不入道故二節量食謂念身中八萬戶蟲蟲得此食皆悉安隱我今以食攝此諸蟲後得道時以法攝彼又雖一食恣貪極噉腹脹氣塞妨廢

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9 100

行道隨所得食三分食二身則輕安名節量食三一坐食謂若重食者失半日功不爲養身斷數數食卽四分律不作餘食法頭陁經中云中後不飲漿衣中三者一唯畜三衣謂白衣好畜種種衣外道苦行裸形而已今佛弟子應捨二邊但三衣也又離多求及守護故二糞掃衣謂拾糞掃物納作衣故以此覆寒障露離貪遠賊無奪命難故三毳衣謂或三衣或長衣一切皆用毛毳而作不畜餘衣故然此十二蓋是知足之行涅槃智論瑜伽俱明其義故知惡貪多欲出家者是所不宜應淡誠之乃至等者以小況大意

云小罪尚須生畏大過豈得安然超越之言故云乃至欲作卽怖已作卽畏畏墮苦故慚天愧人故云慚愧又慚謂崇重賢善愧謂輕拒暴惡改悔者改於往過別修善業悔前所作憶恨在心不得輕戒者如菩薩戒說於十重戒中犯微塵許罪便不得發菩提心失比丘位國王位乃至佛位仍二劫三劫墮三塗中不聞父母三寶名字何況具足犯十戒也故戒序云莫輕小罪以爲無殃水滴雖微漸盈大器利那造罪殃墮無間故涅槃中有浮囊之譬故知佛所制戒豈得輕而犯之疏攝善法者依此戒約則一切善法自

然攝取護戒心者謂夕惕若厲造次弗離護之若珠纖毫無犯也攝衆生戒者此當涅槃所說息世機嫌戒也謂行非律儀及受畜非法之物招人譏謗即生他罪他罪所生本由於已故須護之護之即不謗不謗卽自然發心發心卽受化受化卽成攝取義也忍中疏他不饒益者亦名耐怨害忍謂被冤家惱害是他不饒益忍耐彼苦無懷報心然所不報有其二意一爲解冤結故如律中長生王偈云以怨報怨怨終不止唯有無怨怨自息耳智度論中亦同此說二爲證佛果故以有智慧知彼此境空無所有能忍是

事彼疑有瞋現同伴侶與其諧和因之得證無上菩提此如瑜伽論說行人若遭他苦時應作三思五想以忍彼事三思者一責業牽殃思謂菩薩若遇他害應作是思此我先業應合他害今若不忍更增苦因便非愛已成自苦縛是故須忍二性皆行苦思又自他身性皆行苦彼無知故增害我身我既有知寧增彼苦是故須忍三引劣況勝思二乘自利尚不苦他我既利他應忍斯苦也五想者一親善想二唯法想三無常想四有苦想五攝受想廣如彼說又金剛忍辱仙人亦同此意論語中說以直報怨以德報怨今

同以直報怨若準上怨與上樂卽以德報怨仁與菩薩優劣可知安受苦忍者於違順境安然忍受不動念故財榮潤已者不論多少但取一切潤已之事盡名爲利損耗侵陵者此亦不論多少但取一切損已之事皆名爲衰越過毀者如有小過毀之言大越德歎者如有片善譽令其廣依實讚者如有一德亦言一德依實過論者如有一過亦言一過逼迫侵形者打擲寒熱饑渴蚊蚋等但是一切有不安者盡名爲苦心神適悅者清涼飽暖視聽香味等凡是一切暢適之事悉名爲樂有說得財名利失財名衰談惡爲

毀談善爲譽對面談善爲稱對面談惡爲譏苦樂卽二受也與此所說各是一意於利譽稱樂忍之不喜於衰毀譏苦忍之不瞋是故論中通言忍也然境界雖多總攝不過違順之二又於二中各有四義收盡二四合說以成八風謂之風者能擊衆生心海起貪瞋煩惱浪故今令忍之則八風不能動也然於中違則易忍順則難忍不唯難忍抑亦難防如賊與子盜於家財防之難易可以比知故天台說爲強軟二賊不能安忍無生聖智何以現前且如令尹子文三仕三黜無喜無慍況行菩薩之行焉得於違順境而不

忍乎更有諦察法忍但於忍境體法無生唯心所現  
三輪空寂唯一真實卽是此忍也△四進中論諸善  
事者前三後二一切善法心不懈退者身由於心故  
但言心懈謂懈怠不能敏行退謂邊墮中道而廢疏  
勤勇精進者勤恪勇猛也勤故不懈勇故不退斯則  
於有義事勇而進也如子路問孔子曰君子尚勇乎  
子曰義以爲尚君子有勇而無義爲亂小人有勇而  
無義爲盜又云見義不爲無勇也冀諸行者審而勇  
之勇之相者淨名云譬如勝怨乃可名勇難壞者志  
堅不怯決定取辦詩云我心匪石不可轉也我心匪

席不可卷也所以然者以知生死定爲苦故以知佛  
果必爲樂故以知衆生與已無異足可度故由是千  
化不變其慮萬境順通其道乃至喪身致命不捨善  
提之心故寶藏論云決歸者不顧其疲決戰者不顧  
其死決學者不顧其身決道者不重其事此其難壞  
也無足者修諸善行意無厭足表異二乘得少爲足  
則欲而不貪也以念等下正釋論意可知此同唯識  
三鍊摩中第二鍊摩無性頌云汝已惡道經多劫無  
利勤苦尚能超少行苦行得菩提大利不應生邊屈  
論是故等者從來爲不修身心常苦惱如今若不修

依前是苦惱由是尅已造修於行無墮也則善人行  
善唯日不足故遺教經云汝等比丘若勤精進則事  
無難者是故汝等常勤精進譬如小水常流則能穿  
石若行者之心數數懈廢譬如鑽火未熟而息雖欲  
得火火難可得是故精進然此一文亦可初是正明  
從當念已下爲方便於中初反釋後順結詳文可見  
△障中論若人者此十信初心之下品也疏業障者  
亦有煩惱障今但舉麤論邪魔等者邪謂外道魔謂  
天魔諸鬼謂堆惕等如下所說事務者世間一切公  
私之事其數衆多故曰種種疏外感報障者由內有

業障故前說善根熏習便見佛身今明惡業因緣乃  
見魔鬼將知外境皆由內心如形端則影直源濁則  
流昏矣△治中疏總明除障者準率嚴經行願中亦  
是別除一障卽我慢障也與今疏文各是一意如入  
下喻釋可知論誠心者以諸障起時心皆猛惡故今  
除遣必枉虔誠故智論云身精進爲小心精進爲大  
外精進爲小內精進爲大猶如赫日可以消堅冰烈  
風可以摧巨木苟有至誠必能動天地感鬼神故使  
事不違願也懺悔者陳露先罪改往修來疏除惡業  
者三障四障也得依正具足故論勸請者於中有請

轉法輪請佛住世之異今通而言之但云勸請疏除謗法障者得多聞智慧論隨喜者三乘四類所有片善皆隨順歡喜疏除嫉妬障者得廣大眷屬論向菩提者亦合迴向實際及與衆生意合此二疏除樂三有障者成廣大善也論常不休廢者念念相續無有間斷疏能治謂行此四行皆不廢故所治卽上之四障皆脫免故論善根增長者謂信心漸進無有邊故結益下可知初一者謂先由迷倒不知罪福妄行十惡今由懺悔畢故不造新故云止持廣說如行願經行善故應作須作故云作持廣說如行願經

## 起信論疏筆削記卷第十八

音切

**鉅**

匹切

**繩**

力切

**紲**

切

**蠹**

蘇切

**抖**

多口切

**撒**

思口切

**脹**

猪口切

**歎**

徒敢切

**蚋**

而銳切

**慍**

於吻切

**毳**

芮切

華亭居士陸彥楨施贊刻此  
起信論疏筆削記第十八卷 嘉興沙彌道梅對  
真州王國英書 吳縣仇鵬刻

萬曆辛卯春清涼山妙德庵識

80

撰述

走行詩語

卷之二

山

十八

山

說法強

新二乘四知所有

是第

第

第

第

第

第

音

第

法師錄輯章附清參集十八

起信論疏筆削記卷第十九

長水沙門子璿錄

△五止觀者此被十信初心之中品也○止中疏先由等者此明未修行已前今以下正明修止謂以始覺覺知諸塵境界唯識所現無外境相塵境既寂分別不生心境俱止也卽破塵相爲止境無分別爲止心心境兩亡寂常心現此同禪宗無念義謂一切善惡都莫思量言下自絕念想圓覺云應當正念遠離諸幻方便者修止之方便故先德云趣寂之前萬境俱泯發慧之後一切皆如但今等者意在顯別故雙

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

標唐楚正修名奢摩他前修方便名爲止也觀亦準此以雙下釋出別意既言隨順將知未是正止也以卽觀之止方名正止卽止之觀方名正觀今旣一向止息但是止之方便未得名爲止行故云隨順奢摩他也問此行是止云何言觀答正修之時止觀雙運止若無觀不名真止觀若無止不名真觀是故正修止亦名觀故圓覺中名爲靜觀雖亦名觀今言止者以就泯相觀於真如真如無相向卽心絕心絕則成止義亦是卽空觀也△觀中論觀義故者此是卽止之觀亦是卽假觀也圓覺中名爲幻觀○疏三初釋

義依生滅門者前依真如門泯相絕心照而常寂故名爲止今約生滅門觀諸法相隨流反流染淨因果凡聖色心差別不同寂而常照故名爲觀此則能善分別諸法相前則於第一義而不動也○如瑜伽下二引證二初正引彼文菩薩地者彼論有十七地此是菩薩地中文無所分別卽根本智因也世俗妙慧卽後得智因也○是知下二會釋彼義可見○然二門下三釋成雙運所以謂依一心上開二種門依此二門修於止觀止觀雙運方得契心契心方名真正觀也故天台云法性寂然名止寂而常照名觀此乃

以修止觀契性止觀也雙修之旨豈徒然哉△三俱中論二義者卽前止一切境界觀生滅因緣也不相捨離者然此止觀初首方便行人修時雖未雙現習此之際須相資而行不可孤運輒相捨離疏有二體者此二通與十度爲體其猶於水澄而復清方能鑒像以二門開於一心焉得不俱定慧耶上文具顯△外緣中疏閑居等者不作衆事名之爲閑無憚鬧故名之爲靜意令心寂當須離喧若欲離喧宜去聚落居阿練若繁塵不對止則易成此有三處可修禪定一深山絕人處二須阿蘭若處離於聚落極近三里

卽放牧聲絕無諸憚鬧三者遠白衣舍清淨伽藍之中皆名閑靜處故當第一戒淨者欲盛妙饌必資淨器戒若不淨定則不生若知先所曾破戒者當宜依法懺悔令戒如故以戒不淨者卽有業障令修止不成便感邪魔病事等以爲侵撓也衣食等者一衣具足以根有三故上者如雪山大士隨得一衣蔽形而已中者如迦葉鞞掃三衣不畜餘長下者如多寒國受乞食法下者阿蘭若處受檀越送食下下者僧常

食及受請除此異求多積長貪妨道今須衣食者若  
闕一種心有所慮得定無由善知識者有三一者辦  
力資緣二者同行勸發三者教授法門如鼎三足闕  
一不可息諸緣務者有四一生活二人事三工巧伎  
術四學問讀誦隨有一事卽有所妨令不得定正脚  
等者押一脚爲半加於中以右押左爲降魔坐以左  
押右爲吉祥坐若兩脚相押爲全加此坐能令儀相  
端好廣如智論說故偈云見畫加趺坐魔王尚驚怖  
何況入道人端身不傾動緩衣帶者恐坐久氣滿不  
安故不令脱落者儀相不妙或恐風寒故約上齶者

禦風閉氣免神散心馳故然欲閉口先且吐胷中穢  
氣吐時開口放氣而出想身百脉不通處教悉開通  
出氣令盡然始閉口鼻中內清氣然閉口時但得脣  
齒纔相柱耳眼不全合者全開則掉全合則昏故但  
令斷外光而已二卷止觀者卽彼初學坐禪止觀本  
只一卷應開成二也彼有十門以修止觀第一具緣  
略如疏明第二呵欲謂色聲香等五欲所言呵者了  
知此五惱惑衆生因之受苦不得解脫淡生厭離不  
復追攀乃名呵也第三棄益蓋謂貪欲睡眠恚掉悔  
疑也所言棄者覺知此五益覆衆生心性不得解脫

如日月爲煙雲等翳不得照明今皆遠離卽名棄也  
第四調和者謂調飲食不饑不飽調睡眠不節不恣  
調身不寬不急調息不澀不滑調心不浮不沈令此  
五事和暢得所故也第五方便行者謂欲進念慧一  
心以能志樂修諸禪定出離世間晝夜精勤進諸善  
法念世無常可輕可賤禪定智慧可貴可重於漏無  
漏揀擇苦樂虛實之相一心決定修行止觀以此名  
爲方便行也第六正修正觀於中有坐時修歷緣對  
境修竝如彼文第七善根發卽同下文現報十益等  
第八覺知魔事如下文說第九治病者先須知病所

起起有四種一從四大起二從五藏起三鬼神所作  
四業因所感旣知病已卽以止觀治前二以呪力治  
第三修福懺悔治於第四第十證果卽入住不退並  
如彼說略知大況若要備見可尋本文調心者心卽  
是意調伏心意令趣向真正故末世下出不正相然  
戒定慧學及諸襍行多有是患菩薩戒疏云佛法內  
人多約四位起行謂三學及襍行初約戒學者有二  
類一矯異者謂雖不破戒性非質直依邪思計現異  
威儀眩耀世間以求名利本無片心以求出離然普  
抑餘人無異威儀者悉爲無德此是沙門賊亦是威

儀賊也如迦葉寶積等經說二約識者謂性非淡智  
恃已戒行將爲出離陵他乘急戒緩之衆聞諸法空  
便生恐怖此是佛法怨賊也出佛藏經二約定學亦  
二類一約貪狂者謂性樂名利久在山中心少澄靖  
現得定相眩耀世人招大名聞普抑餘人無此相者  
悉以爲非此是阿蘭若賊也出華手經二約邪慢者  
謂性非多聞依山習定鬼神加力心定有見既不善  
覺知卽恃此起慢當大名聞陵滅餘人悉以爲非毀  
傷佛法此是魔黨大賊也出起信論及華手經三約  
慧學者亦有二類一約淺者謂性少聽誦學無次第

爲名利衝心急預講說已見臆斷非毀古今唯求利  
名元無出意恃自無行亦輕侮戒定此是賣佛法賊  
當招大苦出華嚴經魔業中二約淡者謂性明辯雖  
於二乘三藏文義少通然猶未得佛意旣當傳法唯  
讚名利以勸後學非毀古今顯自獨絕恃此爲德起  
慢陵人但誦持法藥而不自減病已負淡愆況更法  
中起病甚不可救奇哉水中出火以何滅之此是害  
佛法之賊出佛藏十輪等經四約襍行者亦二類一  
約福行者謂性非質直苟爲姦計共崇奇福眩耀世  
人招引重覬意在以少呼多用此活命旣遂其所求

卽恃此起慢陵蔑餘人無利養者悉以爲非利養既爾名聞亦然此是賣佛法賊出迦葉經二約餘行者謂性非慧悟隨學一法卽便封著眩此所學以招名利撥餘修者皆非究竟此亦愚人蠹害佛法賊也行人苟沾一患宜深戒之離此下明今意皆可解△離境中疏皆是事定者兼前數息等不唯此五十一切處卽青等四空等五及識爲十言一切處者觀一一法皆徧一切處故由此亦名十徧處觀亦可等者謂不依心散亂時眼所見色乃至意所知法等六塵聞謂耳鼻覺謂舌身知卽是意攝六略盡今舉能取所

也於此下釋意以推此等唯識所現無別有體旣知心外無塵豈合將心外託若不然者豈名修正耶已上諸定所緣皆是權小教中之所施設斂令制心漸發無漏今此實教故並不依卽直賜寶乘不與羊鹿也△論一切下二初遣妄想中一正遣疏餘心皆遣者此有二義一除見聞覺知外更有心想隨何等念悉皆除遣二除前數息骨鎖十徧處境觀想之外更有九想八背等一切事定觀想悉皆不依以今心心向理故揀去事想故云皆除所遣等者依幻說覺亦名爲幻若說有覺猶未離幻說無覺者亦復如是故

亦須除是則幻心滅故幻滅亦滅也餘文易解○論以一切下二釋成疏順法性者雖言一切法意在真性以一切法悉皆真故皆同如故廣如真如門說斯則離心緣相也轉釋等者科指此文良以下釋此文意前言法性本無想者實由想體自空本自不生今則無滅此蓋本空非推之使空也此乃下會釋文旨非謂待無念時方始不生不滅以念念生處即是無生念念滅時即是不滅如經云初生卽有滅不爲愚者說又經云當處出生隨處滅<sub>並</sub>諦明可見○論亦不下三重揀疏若心等者先反縱意云外境若實有

體抑心不緣終不可得以不可不緣之故後得以心除心此卽縱其可除也然剩者之一字復詳此文似剩不故者之三字但只可言抑令不緣可得後以心除心也義方彰顯請更詳之今旣下正明旣知無境心自不生豈得放心外緣後更除遣豈非自徒勞耶如人令子爲非又復譴責斯何理耶○論心若下住正念二初正顯也疏初習等者此與前爲異前則不放心外緣此乃任運馳散外境唯心等者本無境界妄起攀緣是名不正今則觀境無境知心無心唯一實相實相外更無別法當爾之時分別不生故名正

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

念○論卽復下二離相疏唯心寂者此唯心之相亦不可得前則離能所分別唯一實相名爲正念今則正念亦無自相以凡所有相皆虛妄故斯則亦不知寂亦不自知知自性了然故不同於木石也△餘威儀中者卽同天台歷緣對境修也謂歷行住坐臥作語等六緣對色聲香味觸法等六境且如欲行便自思惟我今何故行有利則行無利則不行然於行時了知行心及行中一切事皆不可得不可得故妄念自息名爲修正卽觀上不可得法一一空寂因緣有名爲修觀住等例此又於見色時修正觀者見

一切色如鏡像水月悉不可得不生分別想念名爲修正色等因緣故有畢竟空寂名爲修觀聲等例此若止若觀俱順法性以法性常寂常照故然天台修正自分三止觀亦復然以約三諦三境修故也今此文約真如生滅二門而修正觀皆順一心卽是雙運雙運卽是息二邊分別中道第一義諦止觀也餘文可知△止成中疏止成者止前方便成也未是卽觀之止附心者以久習故隨心成止以隨心故卽成三昧卽真如三昧也真如三昧方是卽觀之止爲奢摩他梵語三昧此云正定故伏惑等者伏四住見修

煩惱未能斷故故云伏惑然此亦有伏無明義論言  
深伏意舍此也此當信位若更增進速入初住故云  
信滿入住入住卽不退△顯障中疏於理猶豫者於  
上甚深義理是非不定故不能入如圓覺經修二十  
五輪云一念疑悔則不能入闡提者阿闡提此云無  
信此則一向以爲不是故不同疑惑外道者爲宗習  
邪法故誹謗正道此乃非唯不信更加此過故異前  
也五逆者弑父母阿羅漢破和合僧出佛身血四重  
者殺盜婬妄問前疏文云有業障者但令懺悔今何  
除之答此中所除約不懺者懺則能入不同小乘有

定業故涅槃經云未入我法業則決定若入我法則  
不決定恃我者此或恃我故不修或修之存我亦不  
能入故圓覺云彼修道者不除我相是故不能入清  
淨覺放逸者或貪放逸故不修或修之不勤亦不得  
入學如不及猶失之況此類乎是六下非謂具此  
六障方不得入但於六中或有一障便能障道不得  
三昧△顯勝中論諸佛法身與衆生身無二者有三  
意一意取衆生法身故二者法身流轉五道名曰衆  
生故三者衆生相空卽法身故於此三中初後爲正  
故淨名云如自觀身實相観佛亦然平等卽無二無

二卽一相也論一行三昧者卽真如三昧也謂住真  
如境故名真如三昧以真如無異相故但行造此法  
故名一行三昧此乃由境一故使智行亦一也前則  
從境得名此則通於法行科云能生者其實卽是義  
說能生也△二中疏法界一相者所緣之境繫緣法  
界者繫緣卽能緣之心也停心諦理與境冥合故諸  
佛法界者諸佛如來所證法門河沙無量隔別不同  
然亦一一不異法性入此三昧者皆悉得知無有差  
別也以此真如等者由真如是一切法根本故修此  
三昧亦與一切三昧爲根本也論若人等者此三昧

既是根本若入此者則能生長一切三昧以末從本  
生故諸三昧自此成也△辨魔事者梵語魔羅此云  
殺者謂能奪行人功德之財殺智慧之命言事以如  
佛以功德智慧度衆生令人涅槃爲事魔不如是常  
以破壞衆生善根令流轉生死爲事以魔樂生死故  
三界羣品盡屬於魔今修行之人志欲出離三界又  
發弘誓廣度衆生魔懼減少眷屬故來撓之令其退  
墮行人要須辨識而降伏之然有四種之異一煩惱  
魔二蘊魔三死魔四鬼神魔前三在內以內修伏之  
鬼魔在外故今甄辨一中疏障礙者障入道人礙令

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

退故堆惕精魅竝如下說三種者魔鬼神也一者違  
情五塵或大或小恐怖萬端故令失志二者順情五  
塵對男現女對女現男令其生染三者平等五塵揀  
去前二卽是此境以魔鬼神之三種各能現違順平  
等之事也△對治疏二初正釋論旨一切等者如上  
所現但是境之一數故故前云若離心念則無一切  
境界之相又云心生則種種法生心滅則種種法滅  
等以此下唯心之義方便教者尚不能知豈彼魔外  
能解此理大論云蠅能緣一切物唯不能緣熱鐵若  
緣熱鐵蠅則成火魔能緣一切境界唯不能緣實相

魔若緣實相魔亦成實相也通遣者凡所見聞但用  
此法而治如天甘露是病皆治故圓覺云除彼所聞  
一切境界皆不可取此皆通遣也○別門下二出對  
治二初略明三初治魔如諸藥炮各有功能般若者  
金剛摩訶之類呪者諸陀羅尼其數非一默念者恐  
彼聞之而解使呪等無力如授藥令服不可令知○  
堆惕鬼者禪病經云羅旬逾長者子初出家時迦葉  
佛所教數息觀靜處見一鬼面如琵琶四眼兩口舉  
面放光以手擊額人兩腋下及餘身分口言堆惕堆  
惕如旋火輪似掣電光或滅或生或作鼠形或作馬

聲或作鬼吟或復竊語種種惱亂令人發狂佛言此鬼是拘那含牟尼佛時有一比丘墮向初果犯邪命故爲衆擯出瞋恚終自誓爲鬼惱亂四衆堆憤者以口云也臘吉支者禪經云此起尸鬼也言偷者或是此鬼愛偷灰瓦故或是連下梵語且兩存之非謂因偷夏臘也故經云諸臘吉支手捉鐵棒等戒律卽聲聞戒諸部律文三歸五戒可知○少男女等者卽順情境謂作父母兄弟諸佛形像等可畏身者或爲虎狼師子羅刹之形種種可畏之像來怖行人如嵬禪師所見或無頭師見之曰善哉汝無頭痛之患

或無腹五藏等皆以言戲之又見年少女人師曰貧道身如枯木心若死灰無以革囊見試此鬼卽時飛空而反仍有偈云大海可竭須彌可傾彼上人者秉志堅貞兕者有說似牛青色一角重千餘斤牙爪銛利能伏千虎乃至者若多於卯時來者必是兔麈鹿等辰時來卽龍鼴魚等巳時卽蛇𧈧鰐等午時卽馬驢駝等未時卽羊鴈鷺等申時卽猴玃猴等酉時卽雞鳥雉等戌時卽狗狼豺等亥時卽猪㺄豕等子時卽鼠燕蝠等丑時卽牛鼴𧈧等△現形中論先是現形如掬多令魔現佛形八部翌從不覺禮拜等若說

下是說法施羅尼云遮持謂持善遮惡故然有多字  
 一字無字魔所說者應唯前二也以不知唯心故不  
 能說無字平等至無願卽三解脫門無怨下顯空義  
 可知此魔但能說而不能證天台云魔能說別異空  
 假中不能證也△得通中論先是得通魔得有漏五  
 通故令行人亦得此通此中過去是宿命未來是天  
 眼現枉是他心前現形卽神境唯不顯天耳含在其  
 中也辯才無礙是起辯△起惑中初起惑以正定令  
 人滅惑魔定令人起惑由行人善根微少故修三昧  
 引此邪相也或捨已下是造業△據定中初據定得

自然下是得禪自然飲食者禪悅食故或於禪中得  
 人間上妙飲食△五中初是食差顏色已下是顏變  
 ○疏二初寄別總指○問如下二約通料據二初問  
 宿世等者如前所說三賢已上乃至於佛能與二乘  
 凡夫作差別緣故今定中所現聞見既同寧知邪正  
 ○答下二答二初歎難解墮邪網者以邪爲正故楞  
 嚴云若作勝解卽受羣邪退失善根者以正爲邪故  
 由是取之捨之二俱有過是故難也如蹈火受焚見  
 寶不取故二皆失失故無進趣之日也○今且下二  
 正揀辨四初標依古法一者深入禪定二者勿移舊

志三者察其本末○如經下二引經爲據三試等者若燒之益粹打之彌堅磨而不磷可謂真矣共事者若颯會聚當共與之從事從事則體其情性也情則易變性則不改故可知之如或未辨久則見之仁者則久而彌芳不仁者不可以久處約也而又未辨當用善巧觀察視其所以觀其所由察其所安自然可見其邪正矣○今僭此意下三依法正揀經中三喻以驗行人真實虛偽故文云行人亦爾也故共事等三試之今文將以驗於定境不同經意故云僭此等但僭其喻非取法也不淨觀者隨看當初所修何觀

或數息或不淨等今於此禪發其境界卽却依本時修習卽驗邪正也○如燒下四合顯經喻二初喻也但舉一喻餘則例知故不言也○此中下二合定譬等者據義順合可知○以此下三結三驗等者旣以定石磨之行槌打之慧火燒之邪正鉅金足可彰矣○對治論以是義者指前五對疏依自等者隨已所有慧力觀彼境界不妄領受當觀諸法實相無邪不破以知境界唯心本自不生終不信任妄有取著墮於邪網若不等者以隨彼境界苟能取著其心則亂以心亂故失於正受正受者不受諸受也今旣受彼

卽名爲失以失正故卽墮於邪無所疑矣邪不干正者以邪法虛妄正法真實真實若立虛妄自壞以修行者深住真如三昧故自然退也若取等者魔所現境意在令人取著念心纔起墮彼無疑若深入唯心是邪則滅是正則存耳是故等者不著則迴邪作正著之則變正爲邪然天台治魔不離二種一止治謂凡見一切外境好惡等事悉知虛誑不愛不怖亦不取捨亦不分別息心寂然彼自當滅二觀治謂若見如上所說種種魔境用止不去卽反觀能見之心不見處所彼何能惱如是觀時尋當謝滅若遲遲不去

但當正念勿生恐怖不惜身命正心不動知魔界如佛界如一如無二如魔界無所捨佛界無所取卽佛法自現魔境自滅今此論中前是觀治故云智慧觀察從當勤正念下是止治止觀二治皆不取也智度等者以生心取境境便成魔境惑其心卽爲魔事且如色等諸法取之則成塵賊不取則成妙境今觀一切唯是實相實相外更無諸法是故見有法者皆是於魔況於定中所見境界可不是魔耶偈云等者如經中說有一比丘魔欲惑之經七千歲竟不得便何以故以是比丘不起心故其猶密室風不能入風得

人者由孔隙故魔得便者由起念故從當下示前論文以對三試之中以定妍磨及依本修治之二也以此下釋所以或曰準論正念之言但當其定云何得有依本修治耶故此釋之故前云不依氣息形色地水火風等此則揀去餘事觀想也又云是正念者當知唯心無外境界卽復此心亦無自相可得又云久習淳熟其心得住以心住故漸漸猛利隨順得入真如三昧等故知深入此定卽是依本修治更無別法以爲本修也問據前所說但是魔境及至今文結其所離何故乃言離業障耶答此有一義一則行人內

有業障故外感魔境若離業障則無魔事今就本言故云業障也二則若墮魔網則成業障以魔樂生从起愛見貪著世間名利恭敬由是造業故成業障今離魔事卽是離業障也△四邪中疏我見等者迷此三惑卽名爲癡卽我癡等是末那中俱生四惑以是俱生故云常相應皆是無明住地所攝故名爲使不減煩惱等者修定本爲除斷煩惱既不能斷何用定爲如服藥病增則知非藥安可更服據謂依仗憑託之義不可憑仗而行也△正中疏不味著者不同外道有見愛故此通指下二句忘心境界者絕能所故是

不味著相也出定等者本不以懈慢故入定所以出定時亦得如此不同外道有我慢故貪瞋等者意本斷惑故得漸薄不同外道貪名利等如服藥病除是爲良藥既知良藥不可不服也△真中論若諸等者文意反明疏卽順釋要依等者以真如是如來之性故修此三昧方是如來之種如人生於王家必繼王業此亦如是除此等者楞嚴云十方如來一門超出妙莊嚴路又云十方薄伽梵一路涅槃門也十住已去者謂六種種性之初卽習種性也不退位者不退有四一信二位三證四行今卽位也△僞中疏四禪

卽色界亦靜亦慮故謂之禪四空卽無色界有靜無慮故唯云定不淨卽觀身五種謂種子住處自體自相究竟不淨廣如下說安般者梵語安那般那此云出息入息上二卽五停心觀之二也等者更等後三及四無量六妙門十六特勝通明禪等一切事定也取境相者以非理定但緣彼息等諸相不稱真如不出三界故名世間定也然天台明諸禪定總爲三一世間禪二出世間禪三出世間上上禪世間復二種一世間味禪卽四禪四無量四空定也二世間淨禪卽六妙門十六特勝通明禪二出世間禪有四一觀

禪謂九想八背捨八勝處十一處二鍊禪謂九次  
第定三熏禪謂師子奮迅三昧四修禪卽超越三昧  
也三出世間上上禪有九謂自性禪一切禪難禪一  
切門禪善人禪一切行禪除惱禪此世他世禪清淨  
淨禪行相廣如次第禪門略如法界次第學者要知  
應檢彼文論味著等者不同真如三昧不住見相及  
得相故疏同得等者三乘人及凡夫外道皆修此定  
然凡夫多味著外道帶異計所修雖同修心有異故  
得果各別也若離等者故前說善知識緣中須教授  
善知識要知邪正以差之毫釐失之千里夫於善友

豈合辜恩故法句經中重重顯讚然修行禪定不易  
其人欲具詣其門須徧覽諸教唯天台三種止觀明  
諸禪修證行相廣在彼文今略依初學禪觀明邪正  
發相邪定發相者或身手紛動或時身重如物鎮壓  
或身輕欲飛或透阨睡熟或煎寒壯熱見諸異境或  
其心闇蔽或起諸惡覺或念外散善或歡喜躁作或  
憂愁悲思或惡覺觸身身毛驚豎或時大樂惛醉如  
是種種邪法與禪俱發名爲邪僞此之邪定若人愛  
著卽與九十五種鬼神法相應多好失心顛狂或諸  
鬼神等知人念著其法卽加勢力令發諸渙邪定智

慧辯才神通感動世人見者謂得道果皆悉信服而  
内心顛倒專行鬼法是人命終若不值佛及善知識  
所護還墮鬼神道中若更生來多行惡法卽墮地獄  
行者修止觀時若證如是等禪有此諸邪僞相卽當  
却之若知虛誑不愛不著卽當謝滅若起念著卽墮  
羣邪正禪發相者若於坐中發諸禪時無有如上所  
說諸邪法等隨正禪發時卽覺與定相應空明清淨  
內心喜悅澹然快樂無有覆益善心開發信敬增長  
智鑒分明身心柔軟微妙虛寂厭患世間無爲無欲  
出入自在是爲正禪發相此二種相如人與惡人共

事常相觸惱若與善人共事久久逾見其美斯亦如  
是行者宜深察之故須善友教授△總標疏後世等  
者妄盡習除證真起化德充法界應用無窮△攝護  
中疏以修等者略同金剛所說持經之者爲如來知  
見護念等如王世子修德進業堪紹國位特爲君之所  
寶也爲佛所念理合如此故云法應△惡緣中疏  
離天魔外道等者如上所治以知諸法實相故不爲  
惑九十五外道者如華嚴說有九十六謂六師各  
有十六種所學法一法自學餘之十五各教十五第  
子師徒合論故成此數今減一如餘處說△惑業中

論甚淡者卽般若妙慧淡達實相今旣入此淡定故不誹謗也重罪薄者已達罪性福性非內外中間我心自空罪福無主三昧漸淡其罪漸減故云薄也疑者謂於理猶豫覺觀謂語之加行今達諸法唯心無外境界內離尋伺於理決定何所疑耶故皆滅之△行成中疏於理增信者信欲成根必務增長漸入不退故不怯者知法如幻故無所怯繩蛇非毒杌鬼無心何所怯耶故下文云若修止者能捨二乘怯弱之見既不怯弱則非同二乘不壞者了他如已故得柔和柔弱故不憍慢不憍慢故人則不惱不惱故不壞

不壞行也無世滋味者世人不學此法則愛見淡固貪著世間今旣知三界虛偽誑人六根焉可貪而樂之不樂則離愛離愛卽減煩惱也故下云若修止者對治凡夫住著世間得禪定者真如三昧成也論外緣卽通舉六塵音聲卽別指耳所對也故楞嚴云純音無塵根境圓融無對所對又云不自觀音以觀觀者能令衆生觀其音聲卽得解脫斯則同諸法無行經入音聲慧法門何所動耶今於六塵中唯舉聲塵者阿含說此以爲禪刺也然上疏文俱於一二等下注者以此解釋便當科文令易解故非謂太近前也

# 起信論疏筆削記卷第十九

音切

憤

公對許久

撓許

甲

訛五

各弦

練於力

覲

切押烏

甲切

訛

眩黃

練

臆切

聰

切

惢補

未丁

護護

詰戰歷

筆益

掣昌

制

兜

徐效思

康廉

之庚

鼴徒何

頓大忍

鰥七由

獲居

罟

切銳于

元猶與魚

福甫服

解諸買

拘居六

磷

獮對

羈

切役於

川危杌五

脣骨

杌切

杌切

杌切

杌切

杌

切透於

危杌五

脣骨

杌切

杌切

杌切

杌切

杌

青浦居士諸從禮施賞刻此  
起信論疏筆削記第十九卷

嘉興沙彌道極

深水毛有光刻

卷一

卷二

卷三

長水沙門子睿錄

卷四

卷五

卷六

卷七

卷八

不義言

卷九

卷十

卷十一

卷十二

卷十三

卷十四

卷十五

卷十六

卷十七

卷十八

卷十九

起信論疏筆削記卷第二十

長水沙門子睿錄

深水毛有光刻

卷一

卷二

卷三

卷四

卷五

卷六

卷七

卷八

卷九

苦海無有福慧不知苦本耽樂生歎不求出離故起大悲哀愍之意故法華云見六道衆生貧窮無福慧入生死險道相續苦不斷不求大勢佛及與斷苦法爲是衆生故而起大悲心第三卽大願觀悲心旣發以願要期不擇怨親勝劣皆令脫苦逮得涅槃衆生界盡我願方盡故能成矣疏四非常者謂非斥彼常情所執之四境故△無常中論一切有爲者除六無爲外餘之四位竝是有爲無得久停者諸法旣生生已卽滅如露如電不可久畱故戒經云壯色不停猶如奔馬人命無常過於山水今日雖存明亦難保無

常經云假使妙高山劫盡皆散壞大海深無底亦復有枯竭大地及日月時至皆歸盡未曾有一事不被無常吞△苦觀中論一切心行等如經中說一念有九十剎那一剎那中九百生滅旣速生速滅誠爲苦也故前云動則有苦果不離因然苦者逼迫爲義五苦八苦種種不同略而論之不離三種謂苦苦壞苦行苦三苦之內行苦最通不唯五趣皆有抑亦三乘悉具今就通義故標一也△無我中論恍忽如夢者念過去法恍惚忽似有而無如存若凡徒有言說實不可得故云如夢何啻過去現在亦然故淨名云

是身如夢虛妄見也疏難追者非謂有體而求之不易故曰難追以全體自空但有言說故云無體也論如電光者應念諸法前屬過去後屬未來於二中間無體可住終不可取故云如電故淨名云是身如電念念不住也疏利那者時之邊際也不住者經云初生卽有滅不爲愚者說又經云利那刹那念念之間不得停住論如雲等者雲起晴空何曾有本法生真界寧見所從以生時無有來處故滅時亦無去處淨名云是身如雲須臾變滅也疏緣集等者兼能集之緣亦無來處竝同於雲然此段文正是空觀今科云

無我者以要對破常等四倒故三世既空則無有方法尚不可得豈更存乎我耶故曰無我△四中論不淨等者淨名云是身不淨穢惡充滿然有五種一種子不淨父精母血之所成故二住處不淨生熟二藏中間住故三自體不淨三十六物共和合故三十六者外相三四醜謂髮毛爪齒睇淚涕唾垢汗便利身體器二六成謂皮膚血肉筋脉骨髓肪膏腦膜中含十二穢謂脾腎心肺肝膽腸胃赤痰白痰生熟二藏四自相不淨九孔常流諸穢惡故五究竟不淨身壞命終不可堪故形骸若斯復何可樂疏除四倒者常樂

我淨是凡夫所執四種顛倒故今以無常等四觀一對治如以四藥治於四病△大悲中論如是等者以悟自身非常既爾當念衆生亦復如是無明迷故不自覺知故起大悲也三界九類故云一切從無始下窮其苦源蓋是無明所作故前文云以有無明染法因故則熏習真如以熏習故則有妄心乃至造業受於一切身心等苦已受下明三世皆苦也難捨等者無明未盡已前不能免故法華云一切衆生爲生老病死憂悲苦惱之所燒煮亦以五欲財利故受種種苦又以貪著追求故現受衆苦後受地獄餓鬼

畜生之苦若生天上及在人間貧窮困苦愛別離苦怨憎會苦如是等種種諸苦衆生沒在其中歡喜游戲不覺不知不驚不怖亦不生厭不求解脫疏無心厭背等者反知厭背苦則有邊故前文說染法得佛後則有斷故十地經云有無數身已滅今滅如是生滅不能於身而生厭離轉更增長機關苦事隨生眾流不能還反深發悲心者衆生與已性無二源真樂本有而背之不求妄苦本空而愛之不捨迷頭認影在此艱辛行者觀之必生悲濟△大願中疏因悲立願者思惟衆生三世之苦難捨離故猛立希欲要結

之心樂具德行濟度彼苦願體者若有分別則不能普度永度便成顛倒不稱法性以法性離分別故然此亦是不顛倒心也長時心者於中初之三句且是內修德本若自無德行焉以化人先利其器必善其事也故華嚴疏云川有珠而不枯山有玉而增潤內無德本外豈能談又淨名云若自有縛能解彼縛無有是處若自無縛必能解縛也後之一句正是長時廣大心者文云一切則九類四生無不攝盡故成廣大初句即是能度方便若無方便則焉令發心故以漚和善巧令悉從化也第一心者高出人天二乘之

境更無過此故稱第一也今詳文中具有四願謂離分別卽誓斷煩惱偏修諸行卽誓學法門盡未來等卽誓度衆生令得涅槃卽誓成佛道既令彼得功歸於已卽是自希證也△精進中論以起等者旣發如是希欲之心應行是事而無怠慢斯則以思無益不如於學故一切善法勤而行之苟能無處不修無時不作勤勇匪懈心不厭捨則自然成就自利利他也△結觀中論若餘等者謂燕坐則唯專於止若從坐起餘諸威儀當應思察利害之事念欲去取也疏順理者一切善法順真如理前文云若人修行一切善

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

法自然歸順真如法故以諸善行外違妄染內順真  
如故云順理卽作持門也違理者一切惡法諸不律  
儀內與法性相違外能招報諸苦故不應作卽止持  
門也△總標中論若行等者此約四儀六緣之中皆  
須止觀雙修定慧俱運疏動靜別修者雖云別修應  
須習其雙運以前文云雖先止後觀次第別辨然至  
修時豈得相離以文不累書故成前後今此文中說  
俱者亦是重辨前文恐人修時各自習故勸皆應  
止觀俱行也以因時俱行果方雙運如有足無目有  
目無足皆不到清涼池獨輪之車豈免覆轍故經云

因地心與果地覺無二無別方曰始終不相離也△  
卽止中論自性不生者故中論曰諸法不自生亦不  
從他生不共不無因是故知無生今舉四中之一故  
云自性此卽無我無造無受者也下卽善惡之業亦  
不凸非有義者徧計全空故言非有依他不泯故不  
言無若言無者則墮斷過以非同兔角畢竟無故論  
卽念因緣等者故經云諸法因緣生諸法因緣滅又  
云因緣和合虛妄有生等疏非無義者依他宛然故  
言非無徧計全空故不言有若言有者卽墮常過以  
非同妄情有所得故此二者性相有殊不二者體用

常俱此順等者有二義一順教卽此所引是佛聖言  
二順理謂不動真際是性不變建立諸法卽性隨緣  
一法二義故云卽也故前疏云不變性而緣起染淨  
常殊良以等者經云法身流轉五道名爲衆生中論  
云以有空義故一切法得成也故能等者約境修心  
以成觀行境旣卽心而存心亦卽止成觀也然前段  
卽真如門後段卽生滅門二門不二但是一心故得  
止觀雙運△卽觀中論雖念因緣等者卽前非無義  
也而亦下卽前非有義也疏不分配者以前影後故

△疏文二初正釋文旨故疏序云不捨緣而卽真凡

聖致一此乃卽隨緣而不變故良以等者經云一切  
衆生皆如也前文云以一切法卽真實性故故能下  
亦同前文約境修心以成止行境旣卽存而心亦  
卽觀成止也配歸二門反前可見○說時下二通示  
用心說有前後等者文不累書言不頓發故觀之與  
止前後而辨若在行人修心之際須止觀融鎔無前  
無後謂卽止而修觀寂而常照也卽觀而修止照而  
常寂也寂照之體卽是一心一心名爲實性故云法  
性寂然名止寂而常照名觀此中不唯止觀不二抑  
亦心境一如謂以無緣智緣無相境以無相境相無

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

緣智境智一如如水與水唯一實相更無別法方名圓頓止觀真如三昧△對障中疏治二過等者凡夫不知諸法自性無生見有人法而起貪愛樂住世間今修止道令知法本不然今則無滅自然見三界虛妄如虛空華不樂住著也二乘得之見法無我於苦不怖豈欲速取寂滅涅槃耶以止下釋所以可知正治二乘者以二乘一向沈空以空爲證怖懼生死但求自利不起利他不成佛法今修觀道知一切法因緣和合虛妄有生因緣別離虛妄名滅知病識藥卽起諸幻以除幻者變化諸幻而開幻衆此則自然離

於陥劣之見而起大悲普能救濟也若凡夫得之則能知無常苦空無我不淨而修諸善行以修觀門不壞緣法能除此障△總結疏非不樂世間者意云不怖生死方能起悲此乃觀成於止猶如合繩乍似樂世間方能修善斯則止成於觀非不怖等者意云上座若比丘於空處樹下閑房思惟當以何法專精修習上座云當以二法所謂止觀阿難曰多修習已當何所成上座曰修習於止終成於觀修習觀已終成於止止觀俱修得諸解脫阿難復問五百比丘亦

作是說阿難歡喜問佛佛深印可止觀相須等者亦如於繩合之方用故涅槃經說二乘菩薩修不均故不見佛性無明邪見自此而生無上菩提由之難入如能具足修習不相捨離則能疾到薩婆若海故涅槃云定慧等學明見佛性法華亦云如其所得法定慧力莊嚴以此度衆生自證無上道由是菩薩行門雖多總攝不過定慧故華嚴云譬如有力王率土咸戴仰定慧亦如是菩薩所依賴天台宗於止觀深意在此故彼云涅槃真法入乃多塗論其急要不過止觀止乃伏結之初門觀乃斷惑之正要止乃養心識

之善資觀則照神解之妙術等若人成就定慧二法斯乃自利利人法無不備也今之學流焉可偏習如天台說若行者如是修止觀時卽能了知一切諸法皆由心生因緣虛假不實故空以知空故卽不得一切諸法名字相貌爾時上不見佛果可求下不見衆生可度是名從假入空觀亦名二諦觀亦名慧眼亦名一切智若住此觀卽墮聲聞辟支佛地故法華中諸聲聞等自歎言我等若聞淨佛國土教化衆生心不喜樂所以者何一切諸法皆悉空寂無生無滅無大無小無漏無爲如是思惟不生喜樂當知若見無

爲入正位者終不能發三菩提心此卽定力多故不見佛性若菩薩爲度一切衆生成就一切佛法故不應取著無爲爾時應修從空入假觀卽當諦觀心性雖空對緣之時亦能出生一切諸法猶如幻化雖無實體亦有見聞覺知等相差别不同行者如是觀時雖知一切諸法畢竟空寂能於空中修種種行如空中種樹亦能分別衆生諸根性欲性欲無量故則說法無量若能成就無量辯才卽能利益五道衆生是名從空入假觀亦名平等觀亦名法眼亦名道種智住此觀中智慧力多雖見佛性而不明了菩薩雖復

成就如此二觀猶是方便非是正觀故縷絡云前二觀爲方便因二空觀得入中道第一義諦觀雙照二諦心心寂滅自然流入薩婆若海菩薩欲於一念中具足一切法者應修中道正觀若能諦觀心性非空非假而不壞空假之法若能如是照了卽於心性通達中道圓照二諦若能於自心見中道二諦卽見一切諸法中道二諦亦不取中道二諦以決定性不可得故是名中道正觀如中論云因緣所生法我說卽是空亦名爲假名亦是中道義此偈非唯是分別正觀亦是兼明前二種方便觀門當知中道正觀卽是

佛眼卽是一切種智若住此觀卽是定慧力等了了見於佛性卽是安住大乘行步平正其疾如風入薩婆若海卽行如來行入如來室著如來衣坐如來座以如來莊嚴而自莊嚴獲得六根清淨入佛境界於一切法無所染著卽一切諸佛皆現狂前成就念佛三昧安住首楞嚴定普現色身能入十方佛土教化衆生嚴淨一切佛刹供養十方諸佛受持一切諸佛法藏具足一切諸波羅蜜卽入頓悟大菩薩位卽與普賢文殊共爲等侶卽常住法性身中爲十方諸佛稱歎授記能八相成道於十方國究竟一切佛事具

足真應二身是名初發心住菩薩然上所說依經明其三觀行相似成別異若在行人卽須三智一心中得不縱橫玆別方是圓修也天台空觀卽此止門假觀卽觀門中觀卽俱運也大約如此△防退中論衆生者十信初心之上品也怯弱等者謂於生死中創起覺悟惑業則無始積集善行則方將修學境強心弱障重力微在於觀心寧無恐劣娑婆者此云堪忍具足五濁實不可居故經云此濁惡世地獄餓鬼畜生充滿多不善聚唯佛如來堪忍住故亦可修忍勝餘方故不能常值等者以穢土之中雖有佛出然不

久住卽入滅度動經多劫空過無佛行者或生佛前  
或生佛後皆不得值以不值故不能供養親近承受  
聖旨懼謂等者其猶孤子未及成人便失恃怙寧不  
憂勞將無所損行人亦爾無佛爲勝緣內心又微弱  
況茲穢境五濁混然期心上求實爲難進擬退聖道  
△聖意中論勝方便者卽念佛三昧十六觀門及佛  
願力等隨願下如隨願往生經所說十方皆有淨土  
若欲生者隨願往生△引經中論修多羅等者卽阿  
彌陀無量壽瑞相及觀經等如小彌陀經說從是西  
方過十萬億佛土有世界名曰極樂樂事極故名爲

極樂有佛號阿彌陀阿彌陀者此云無量光明壽命  
弟子國土莊嚴悉無量故其國土莊嚴佛身功德微妙  
殊絕難可思議廣在經文不能具述然凡往生者  
都有九品因行有勝劣往生有升降輦開有遲速成  
道有前後上上品者發三種心謂志誠心深心迴向  
心具足戒行讀誦大乘一日乃至七日卽得往生佛  
及菩薩親來迎接觀音菩薩執金剛臺等至行者前  
其人乘此隨佛之後如彈指頃卽生彼國生已見佛  
聞法開悟經須臾頃徧至十方於諸佛前次第受記  
還至本國得無量百千陀羅尼門乃至下下品者五

逆十惡具諸不善以惡業故合墮地獄經歷多劫臨  
命終時遇善知識教令稱佛名號於念念中除八十  
億劫生歟重罪具足十念乘華往生佛及菩薩共來  
迎接生彼池中蓮華之內滿十二大劫蓮華乃開觀  
音勢至而爲說法聞法歡喜滅罪除障發菩提心等  
如要備見請覽彼經問準隨願往生經說十方皆有  
淨土云何偏指西方答因易緣強勝餘方故因易者  
十念爲因故緣强者彼佛願力故以彼佛因中有四  
十八種廣大誓願於中云若有衆生欲生我國十念  
成就不得生者不取正覺有茲所以故偏指也具如

瑞相經常見佛者約生彼說也若觀法身者約今修  
因也疏三位者料揀往生之人正是說於已生彼者  
若觀經中具明九品天台所判上三品人始從習種  
終至解行菩薩中三品是十信已下以能持戒孝養  
等而求生故下三品是今時悠悠凡夫以作衆惡重  
罪臨命終時遇善友勸方願生故上上品見佛聞法  
便證無生故是道種人上中品位當性種上下品位  
當習種一得道有遲速二所乘有勝劣得道遲速者  
上上品如前生已便證無生上中者生經七日得不  
退轉經一小劫得無生忍上下者經三七日能游十

方過三小劫得百法明門住歡喜地乘勝劣者初金剛臺次紫金臺後金蓮華今疏約三位者但就九品中前六品說初位卽彼中三品人也第二位卽彼下品人第三位卽彼上中上上品人也以是料揀不退義故故此判也無退緣者以彼壽命長遠又無女人無三塗無寒暑無饑渴無冤親無老病所欲隨心常與聲聞大菩薩等而爲伴侶常見佛聞法水鳥樹林皆演苦空無常無我念佛念法由是善業則自然增長塵勞則任運消除直至菩提更無退轉故彌陀經云若有人已發願今發願當發願欲生彌陀佛國

者皆得不退於阿耨多羅三藐三菩提與此穢土修行香壞有隔猶如二人共至前所一則徒步一則乘載如是二人難易可見彼此二境修行等差亦復如是然今有人不審利害於兩土察因緣之勝劣說空行有數寶受貧往往窮理以無西沈空而謗教信鄙俚於後代非方便於先覺恃已爲是何是之有謂我情忘何情之忘及乎讚喜謗瞋惑之盛矣殊不知存我入覺覺思遠焉而網信安養爲息肩脫屣之地者吾爲之傷之弗能已也佛記等者楞伽經說龍樹比丘住初勸喜地能破有無見往生安樂國後二位者

卽十信滿足及三賢位人以觀真如法身勤修習故願生彼國卽是九品中上三品人也反知初位信行未滿者即可對前常見於佛終無有退之文也然今論云若觀真如法身畢竟得生斯則觀已方生住正定也故知不可作生後方觀而解有智請詳△勸修利益者卽流通分也旣陳法義廣示修行圓頓之根必依悟入今總舉前說勸令受持聞思修習得利益故文中具說三慧益相仍舉不信毀謗之過今但云勸修利益者何也謂舉淺該淺故不言聞思因勸而修故自無疑謗由是但云勸修利益結前生後中論

如是等者指前三分所詮法也謂一心二門二覺二不覺四位二相三細六麤五意六染二礙四熏習三大二身二見三心四方便六度三心相四信五行等竝已說了然此等諸法盡是大乘之中差別法義故云如是摩訶衍等諸佛祕藏者卽大涅槃三德甚深是佛所證非因位能窮故名祕多所含容而無積聚故名藏此之祕藏具足三法謂摩訶般若解脫法身一一皆具常樂我淨故名爲德雖有三名而無三體如天面三目不縱橫竝別非一二三而一二三故名祕藏然上所說差別法義以此三法往收鑒無不盡

何謂也如上一心是總舉祕藏體具足三大義故二門不離真俗二諦真中泯相卽空是般若顯實是法身生滅是俗諦正是解脫二覺中本覺是法身始覺是般若始本不二是解脫四位中隨一一位皆有能證智是般若所證理是法身離障處卽解脫二相中智淨相是法身般若不思議業相是解脫四鏡中如實空鏡是法身因熏習鏡是般若後二鏡是解脫又初是法身二是般若解脫後二中三是般若法身四是解脫九相中前七屬煩惱是般若造業是解脫受報是法身五意六染二礙攝入九相可以意得四熏

習中染熏方離無明妄心境界起成惑業流轉生眾如九相所配淨熏中真如是法身熏起始覺是般若離障處卽解脫三大中體是法身相是般若用是解脫二身中真身屬法身般若應身是解脫對治邪執能對是般若二見無處卽解脫正理顯處卽法身三心中直心卽法身淡心卽般若大悲心卽解脫六度中度度皆具三種如云以知是般若法性是法身本無慳貪是解脫三心相中真心卽般若法身方便及業識心卽解脫四信中信真如卽法身信佛卽般若信法與僧卽解脫五行中前四卽解脫止卽法身觀

卽般若或一一行皆具三種以此三法統收一切靡不皆盡此三不離前之一心斯則十方三世一切佛法皆此論攝故名祕藏我已總說也△舉益論如來甚深境界者一心二門三大也一心則法甚深三大則義甚深二門則理事甚深皆是如來所證之境故正信者以此爲實不信諸法故旣生正信故離誹謗離誹謗故入大乘道道卽因義能通佛果故持此論者教是大乘之門欲入大乘故須持教或讀或誦總名爲持視聽所知悉名聞慧疏思慧者思惟其義修慧者如說修行論究竟等者始因聞思終得佛果故

又一得永得故云究竟佛果圓通名之爲道△聞益中論若人等者有二意一者但能如此不怯他時必得如來授記如寶藏佛說釋迦後時必得然燈如來授記二者景行若斯義合得記如圓覺經清淨慧章末云若人聞此法門不生驚畏是則名爲淨覺隨順汝等當知如是衆生已曾供養百千萬億恒河沙諸佛植衆德本佛說是人名爲成就一切種智義同此也又如法華說如來滅後若有人聞妙法華經乃至一句一偈一念隨喜者我亦與授阿耨多羅三藐三菩提記△思益中論假使者實無此人假設而立故

三千大千世界者俱舍云四大洲日月蘇迷盧欲天  
梵世各一千名一小千界此小千千倍說名一中千  
此千倍大千皆同一成壞配亦可知十善者化人令  
行十善果招天上雖卽數多不離三界不成無漏若  
思此法是佛之因究竟令得無上佛道時雖不多功  
不可喻豈將世善而可竝耶△德多中論受持者領  
受法義任持在心食頃之際散心思惟功不可喻況  
一日一夜定心觀察時長行勝所獲功德誠如此言  
不可思說也△校量中論假令等者此中校勝文雖  
不多義則甚廣以能歎之人是無上大覺具一切智

有無礙辯凡所歎說無不究竟今則不獨一佛所歎  
仍舉十方一切諸佛是人勝而復多也又非於少時  
間仍各於無量無數劫中是稱歎時長也非謂多佛  
於長時中歎其功德令得邊際而又復言亦不能盡  
是知義豐文約之教比餘處校勝之文實爲盡矣△  
所以中論何以故者果人無量劫數無邊於爾所時  
經爾所佛歎所不及有何所以耶謂法性下釋也謂  
性無邊故功德如性亦復無邊以修習斯論者卽是  
深入法性之所獲故△謗毀中疏罪重者受持旣若  
福多毀謗合招罪重準大般若經說謗法衆生入阿

鼻地獄經無量劫遇此境壞則寄餘界地獄如是展轉徧歷十方還至本處罪由未盡今言無量大苦是此類也亦如法華經說謗經之人其人命終入阿鼻獄具足一劫劫盡更生如是展轉至無數劫從地獄出當墮畜生等止謗者亦是勸信獲罪若是宜可止之故勝鬘說若自有智則自體會若不解處則仰推如來非我境界苟能如此則何殃殃及於後世耶論以深下或問曰以何義故不信毀謗者獲罪如斯故此釋之亦如法華云斷佛種故受斯罪報以一下又難曰但謗此論如何乃言斷三寶種成自他之害耶

故此釋之疏果人得涅槃等者此但約人互顯影略而言據理則一得俱得故非別證如般若心經說菩提薩埵依般若得涅槃三世諸佛依般若得菩提此亦如是法寶等者以論中如來是佛寶菩薩是僧寶若不信此法則無菩薩修行卽僧寶斷絕若無修行則不證菩提涅槃是法寶斷絕若不證果卽無如來是佛寶斷絕三寶斷絕皆由不信毀謗是故獲罪經無量劫受大苦也將知大罪莫大於謗法耳△結勸中論過去卽釋迦之流現在卽馬鳴之類未來卽今之行者楞嚴文殊歎觀音圓通云過去諸如來斯門

已成就現在諸菩薩今各入圓通未來修學人當依如是法我亦從中證非唯觀世音無異路者經云此是微塵佛一路涅槃門又云十方如來一門超出妙莊嚴路△總結中論諸佛等者諸佛謂能證能說之人甚深下卽所證所說之法此中深廣等是總指三大深約豎論大約橫說二皆絕待故加甚廣之言謂深中之深非對淺之深故云甚深大中之大非對小之大故云廣大或可深廣大三字別對體相用之三義深是體大謂實相真法非因位能窮唯佛究竟故大論云智度大海唯佛窮底又法華云深固幽遠無

人能到此則約過去無始未來無終不生不滅故云深也廣是用大謂過河沙之妙用潛興密應無有休息無有窮盡此無盡之用一一同於覺性無有邊涯無有分限故楞嚴云我以不生不滅合如來藏而如來藏本妙圓心周徧法界是故於中一爲無量無量爲一小中現大大中現小不動道場徧能含受十方國土坐微塵裏轉大法輪等故云廣也大是相大相謂義相卽前所辨大智慧光明義徧照法界義等過於河沙無漏性德與真如體不離不斷不異不思議非深非廣能深能廣故受大名所言甚者通貫三字

謂甚深甚廣甚大俱絕待故此之三法徧能含攝一切佛法亦攝一切衆生法含攝雖多俱不離一心者是諸佛所證之極致是諸佛所說之根本故前論云謂欲解釋如來根本之義令諸衆生正解不謬故今論主以少言句隨順此法略而說之言雖約略理無不備故云總持說也故前文云如是此論爲欲總攝如來廣大深法無邊義故應說此論論如法性者法性徧滿圓無際故造論功德如性廣大亦無有際法性甚深無窮盡故造論功德如性甚深亦無有盡法性無漏離諸染故造論功德如性無漏非垢非

染法性無爲離施作故造論功德如性無作非有爲相不可破壞盡於未來如是功德無量無盡無漏無爲欲何所利由是論云普利一切衆生界然利衆生不出二種一令離苦謂離分段變易二生死故二令得樂謂得菩提涅槃二無上樂以衆生有三乘五性四生九類差別不同故云一切今迴如性功德普霑利之令彼隨自根性咸得其益終至究竟無上覺道耳

音切  
起信論疏筆削記卷第二十

睭達計

肪

膜

密各

但良子

切

切

切

切

雲間居士徐益孫  
陳善保父仲山母朱氏壽考

延長福智廣大共  
施賁刻此

起信論疏筆削記第二十卷

嘉興沙彌道梅印

真州王國英書

建陽黃國斌刻

萬曆辛卯夏清涼山妙德庵識

爭

不

出

一

無

益

人

休

也

休

休

休

休

休

80 1 2 3 4 5 6 7 8 9 10 11 12 13 14 15 16 17 18 19 20

五三十一